

東
華
續
錄

東華續錄

咸豐六十六

臣王先謙敬編

臣陶濬宣恭校

十一月乙卯朔恭纂 宣宗成皇帝實錄 聖訓成 上詣保和

殿行禮御太和殿作樂宣表如儀子在事王大臣及臣工賞資升

敘各有差○命彭蘊章爲大學士以許乃普爲工部尙書朱醇爲

左都御史調沈兆霖爲戶部左侍郎以劉岷爲工部右侍郎由內閣學

士○以吏部尙書翁心存協辦大學士○丙辰曾國藩文俊奏八

月二十八日瑞州之賊由西路來搦戰我軍寶營湘中營出隊擊

之仍退聚西路官軍兩路夾擊賊敗走九月初三日劉騰鴻等由

外城直趨飛蛾亭朱祖貴等由金川門入時甫五鼓飛蛾亭守卡

之賊酣睡我軍圍而殲之燒濟賊之戶百餘家初十日賊由西門

出隊伏於城北田畔省兵五營出隊擊之賊卽返奔十五日西門出賊二三百人護礮船上犯北城出賊約二三千圍撲省兵營壘劉騰鴻派兵由河岸趨西門橫截之昇大礮堵擊賊船瑞州城內多廣東老賊槍礮最準劉騰鴻亦以火器擅長斃賊二三百名賊隊不退我軍亦堅立相持賊忽回頭搗戰劉騰鴻之親兵素稱驍悍莫不一以當十刀矛並舉賊遂紛紛奪路入城臣曾國藩九月初三日赴瑞州軍營二十日仍回省河在瑞周視城垣履勘各路與各營官熟商必須先斷南路臨江之接濟而後可以困賊自二十日後賊之礮船不時上衝石鼓嶺擾湘勇各營之後二十七日普承堯等因南路之陰岡嶺傅家墟等處係臨江各賊接濟之路派黃澤遠等兩營往剿二十八日賊窺我分兵遠出遂來撲犯老營西門出賊二千伏樹林中南城賊數百名護礮船上衝營壘劉

騰鴻昇大礮至河岸截擊賊船普承堯率寶營擊樹林中之伏賊傷斃數百賊始遁竄入城三十日賊復以戰船上犯陸賊二千餘人撲省兵之營壘適黃澤遠等兩營往剿陰岡嶺傅家墟者自南路歸來南城之賊卽遁竄入城當我師之全集瑞州也後路之新昌上高二縣時有逆匪回竄前經吳坤修回剿一次上高之賊復來竄踞飭知縣傅自銘募勇五百人與新昌縣知縣沈曦營勇協同剿辦九月十七日傅自銘等率平江勇由北路進新昌撥魏大伸等兩營由南路鈔擊十八日馳抵上高逆匪大隊由西門來撲我軍分路夾擊又有臨江援賊數千拌死堅拒平江勇眾寡不敵卽時潰散傅自銘手刃數賊力竭陣亡曾國華劉騰鴻等以上高爲瑞軍後路不可令寇氛梗阻卽派黃澤遠等三營於十月初三四等日進剿連獲勝仗立克上高縣城查瑞州地接兩湖爲西路

要衝但使屯兵屹然不動大局終有可轉之機上高縣知縣傅自銘募勇剿賊力戰捐軀額懇 天恩交部照知縣例從優議卹守備詹榮清應請照例議卹 上諭內閣瑞州剿匪獲勝並上高縣再被賊擾旋即收復上高縣知縣傅自銘募勇剿賊力戰捐軀深堪憫惜著照知縣例從優議卹守備詹榮清著照例議卹○河南巡撫英桂奏 臣於十月十六日馳赴亳州與袁甲三合兵一處察哈爾馬隊於十八日始全數到齊當會同西凌阿挑選一千名飭令穆騰阿等管帶並令格綳額等管帶吉林黑龍江馬隊崇安等管帶步隊鄭廷錦等率領鄉團均於十九日由雙溝向東直擣賊巢行至姬橋以南突遇伏匪數百人經我兵四面兜殺殲斃二百餘名生擒六十餘名二十日分兵三路進至三丈口該匪三千餘人與團勇相遇正在接戰適兩路兵勇齊到併力衝擊殺死賊匪

七八百名生擒一百餘名立將該處匪巢平毀餘匪盡往東南逃竄二十一日捻首龔得率領匪黨數萬已由順河集苗家集等處直竄太和縣境逼近縣城穆騰阿等因南路喫緊一面令鄭廷錦等帶領鄉團回駐雙溝以防宮吉寺等處賊匪西竄一面督帶馬步渡河往南跟蹤追剿二十二日行至舊縣集遙見該匪萬餘纔擁而來我軍槍礮齊施將賊羈退馬隊向前衝擊附近村莊突出伏賊數千前賊亦折回抗拒參將賽沙布等各率兵勇併力迎敵該處鄉團適從西面趕至隨同剿殺鏖戰兩時之久賊匪愈聚愈多我軍佯退該匪向前猛撲崇安親督兵勇從右哨鈔出賊後穆騰阿等指揮馬隊左右衝擊該匪紛紛潰敗自相踐踏我軍奮力追殺四十餘里直至茨河西岸沿途殲斃賊匪二千餘名落河淹死無算奪獲大小礮位四百餘尊大車四百餘輛餘匪向東北狂

奔天晚收隊查該匪經此次痛剿勢必回踞老巢且探聞張落刑李廷彥等已將徐州匪眾撤回救援龔逆亟當乘勝將渦河南岸賊巢盡力剿洗臣已飛飭穆騰阿等迅速追剿尤恐北路張逆一股與南路龔逆餘匪糾合愈難撲滅復與袁甲三督飭朱連泰等管帶後隊兵勇直趨東北會合莫爾賚額等馬隊且探且剿如張逆回竄卽迎頭截擊儼仍攻撲徐郡卽馳往助解城圍其伊興額原帶馬隊本令關保管帶隨同大兵進剿就近由蒙城馳赴懷遠惟見在各股賊匪逼近宿州情形喫重而徐郡防剿尤爲緊要已移緩就急飭令關保管帶前項馬隊徑赴徐州助剿飛飭郝光甲珠克登星速移營前進分兵援應宿州兼顧蒙城以杜竄越上諭擒匪竄擾渦河南岸經英桂飭令穆騰阿等各帶兵團由雙溝直搗賊巢追殺四十餘里直至茨河西岸斃賊二千餘名落河淹

死無算著該撫督飭帶兵文武將渦河南岸賊巢乘勝迅卽剿洗盡殲醜類毋稍玩延○諭軍機大臣等英桂奏南陽情形緊急添兵剿辦等語匪徒竄踞鄧州賊首余姓分黨四出並竄入新野縣境官軍接仗失利南陽新野兩城勢極危急此時邱聯恩帶兵諒已馳抵該郡英桂因兵力尙單將駐防光山官兵三百名命參將成景帶往援剿著卽督飭該員等迅速進剿並飛調官文所派湖北官兵合力攻擊前調陝西兵二千名已據譚廷襄奏派副將龍澤厚統帶前往著一併迅速迎提英桂仍當察看南陽緩急情形隨時派兵策應儘令蔓延北竄朕惟該撫是問將此由六百里諭令知之○諭前據何桂清奏吳坤修所帶彪勇未到廣信當經諭令曾國藩文俊飭令該員迅速馳往以便饒廷選交替後回駐玉山茲據曾國藩等奏吳坤修一軍因奉新安義靖安三縣紳民懇

雷勦匪未便調往見飭李元度由崇仁帶兵馳赴廣信駐防惟江西餉項支絀若僅紮郡城不能設法籌餉擬令駐紮貴溪招徠商民請飭饒廷選仍駐廣信等語該省兵餉專賴錢漕接濟若移李元度於貴溪俾河口商民可以復業七屬錢漕可以徵收於餉稍甚有裨益玉山卽係廣信所屬饒廷選之駐廣信與駐玉山相去本不甚遠著何桂清卽飭該總兵仍在廣信畱防卽婺源開化等處亦可就近兼顧似此通融辦理旣於浙省之兵力無損並於江西籌餉事宜較爲有益將此由五百里諭令知之○河南巡撫英桂奏請飭直隸山東山西各督撫挑選戰馬一千匹解赴軍營備用從之○命湖南巡撫駱秉章撥漕米三萬石運至湖北荊州營以濟軍食○以江西宜黃崇仁兩城克復撫州老營被陷降同知李元度爲知縣拔花翎予陣亡同知林源恩等祭葬世職○戊午

諭內閣惇郡王奕誼第二子著命名載漪○諭軍機大臣等前據邵燦庚長奏十月十四日捻匪圍偃徐州官軍出戰獲勝該匪卽於十六日敗退蕭縣亦經解圍該漕督等摺係二十二日具奏本日據怡良趙德轍奏二十一二等日接徐州緊信酌令福興緩赴江西督帶馬隊官兵馳往徐州救援等語自係未知徐州解圍消息不得不移緩就急以扼北路要衝見在該郡業已解圍其紛竄各匪有史榮椿督兵追擊並據德興阿等奏於派往各兵內酌留協剿兵力不爲單弱江西賊匪甚熾尙少統兵大員福興自應仍赴江西該將軍渡江後必知徐州解圍之信無論行抵何處仍著折回由蘇浙一帶取道前往江西毋稍延緩將此由五百里諭知怡良趙德轍並諭福興知之○實授趙德轍江蘇巡撫以楊能格爲江蘇按察使

由蘇松
太道遷

○庚申何桂清以病免以晏端書爲浙江

巡撫吳廷棟爲山東布政使賞陸應穀四品頂帶爲直隸按察使

已革河南巡撫

○辛酉諭軍機大臣等何桂清奏皖南賊援屬集請由江

南大營添兵助剿一摺據稱逆首石達開糾黨三四萬自十月十一日至十四日併力攻撲涇縣城池復分股擾及甯國縣地方涇縣官兵因糧火不繼道路梗阻已退回甯國縣城固守見在徽州各路無兵可分甯郡大軍亦兼顧不及皖南情形萬分喫緊業已飛咨和春撥兵救援等語逆蹤分股竄擾徽甯各處宣城涇縣二處鄉村賊勢蔓延百餘里儻令與甯國郡城之賊聯爲一氣則建平廣德路路可通浙省邊防實形危急著和春卽撥精兵三四千名迅飭傳振邦統帶星馳前往甯國一帶會同鄧紹夏相機力剿毋稍遲延其溧水一路攻城各軍卽著和春速派得力大員督辦仍著何桂清嚴飭師長鎮等由甯國縣一路步步前進先行疏通

軍火糧餉之路規復涇縣城池以杜該匪內竄昨已簡授晏端書
爲浙江巡撫不日卽當飭令赴任何桂清仍當力疾調度不可稍
形鬆勁至石逆由池州而來一經糾結卽至三四萬人皆因地方
被旱飢民爲其裹脅以致愈聚愈多怡良兼轄安省自應亟籌妥
辦著速委明幹曉事大員分衛銀米馳赴甯郡一帶將未被裹之
飢民加以撫恤免致流而爲匪其已陷賊中者亦著設法招徠俾
得漸就解散則賊勢自孤於剿辦亦易得手將此由六百里各諭
令知之○壬戌諭內閣舒興阿奏收復姚州城池肅清地方一摺
雲南姚州回匪戕官踞城節經提督文祥督兵圍攻連日殲斃悍
匪四百餘名生擒馬從友等正法兇狠匪徒多已臨陣被戮城內
被脅良回及被陷漢民畏威投誠於九月初五六等日將戕害學
正盛續芳首犯何添冲並匪首馬幘才等縛獻大營割取要匪沐

老十等首級呈驗繳出槍礮刀矛帳房多件官軍於收復城池後復將著名兇匪馬隴驤等四名緝獲並各路擒獲要匪馬灤等三十一名均分別凌遲梟示著名匪徒安十三太寶等均已臨陣殲斃地方肅清辦理尙屬妥協在事文武員弁著准其查明保奏○諭福濟鄭魁士奏進攻賊壘獲勝並擊退賊援一摺安徽桐城逆賊疊次出撲官軍營壘鄭魁士秦定三與副都統麟瑞各督兵勇分三路迎剿協領富和等帶領馬隊從兩旁鈔截賊眾大潰官軍乘勢追殺至城下山岡伏賊忽起復被兵勇擊敗餘匪狂奔入城計先後斃賊一千餘名奪獲旗械馬匹數百件此股賊匪踞城日久屢經官軍進攻獲勝勢漸窮蹙福濟見由巢縣拔營前往兵力愈厚著卽會同鄭魁士督飭將弁迅將該城克復毋再延緩○河南巡撫英桂奏豫省剿辦捻匪兩次獲勝並飛咨江皖兩軍扼要

堵剿得旨此兩次獲勝並未殲斃渠魁追殺者皆係裹脅似此等
勝仗與巨逆何傷獨不能懸賞激勵耶○癸亥諭軍機大臣等本
日據官文胡林翼奏剿捕襄屬竄匪獲勝一摺並另片奏都興阿
等駐紮要隘礙難分赴襄陽請飭英桂速派馬隊迎剿等語襄陽
匪徒竄踞鄧州南陽新野兩處情形危急都興阿既不能帶兵前
往官文等仍當督飭所派文武各員無分畛域越境追擊與豫省
官兵會合庶可一鼓殲除見在皖豫捻匪肆擾卽由三省官兵不
能合力兜擊所致官文等豈可再蹈覆轍且此股匪徒由楚入豫
該大臣等更不得以襄樊無事遂置豫省於不顧著卽嚴飭唐訓
方等乘勝進剿尤應繞出賊前迎擊不得一味尾追致令北竄其
分竄襄屬四鄉餘匪及隨州土匪並著速飭帶兵員弁悉數殲除
毋畱餘孽鄧州一帶地勢平行馬隊易於施展英桂見在剿捻喫

緊並著察看情形如有馬隊可以抽撥亦卽酌量調派協同邱聯恩會合楚軍奮力進攻迅圖克復陝西官兵二千名已據譚廷襄奏派副將龍澤厚管帶前往南陽當已行至鄧州一帶著卽飛催會同進剿諒此烏合之眾得三省兵力殲除不難剋日蕩平也將此由六百里各諭令知之○命楊培來京以四品京堂候補以祥奎爲四川布政使曹澍鍾爲四川按察使由浙江鹽運使遷○予湖北陣亡府經歷栗瀚源等祭葬世職○甲子諭軍機大臣等孝順蔣爵遠奏黔省軍務緊急請續調川兵以資剿辦一摺黔省剿辦下游苗教各匪此擊彼竄兵力實形單薄前經樂斌派鍾琦帶兵一千名協剿已改撥雲南蔣玉龍等所帶之兵到黔後多因瘴疫患病見在黔省軍情緊急著樂斌挑選精兵一千三四百名揀派得力大員管帶由瀘州一路馳赴黔省聽候調遣其川營實在患病各

兵卽著撤回歸伍以資勦辦而示體恤將此由六百里諭令知之
○諭蔣爵遠奏軍餉不繼請飭廣東籌銀速解一摺廣東解黔餉
銀本年收到三批共十五萬兩俱係歷年欠解之款其上年令葉
名琛等籌解銀二十萬兩至今尚未解到見在黔省勦匪喫緊餉
需支絀關係匪輕著葉名琛卽將前諭籌備解黔銀二十萬兩迅
速籌備分起派員陸續解黔以濟要需毋稍遲誤將此由六百里
諭令知之○以貴州清平縣城失守巡撫蔣爵遠下部議處○乙
丑諭內閣嘉慶六年欽奉 諭旨 文昌帝君主持文運福國佑
民崇正教闢邪說靈蹟最著海內崇奉與 關聖大帝相同允宜
列入祀典用光文治當經禮部太常寺奉准一切禮節祭品均與
關帝廟同見在 關聖帝君已升入中祀 文昌帝君應一體
升入中祀以昭誠敬一切典禮著該衙門妥議具奏○諭軍機大

臣等鄭魁士見任壽春鎮總兵鳳穎皆所管轄且熟悉蒙宿一帶情形茲將三省官兵均歸節制必能奮勉立功掃蕩羣醜桐城屢勝之後賊勢漸蹙福濟務與秦定三督飭將弁奮力進攻速將該城克復毋再延緩所請催河南馬隊官兵已諭知英桂飭令迅速赴皖該撫卽派員催提以資勦辦將此由六百里諭知福濟並諭秦定三鄭魁士知之○諭前據英桂奏遵旨飭將關保等原帶馬隊五百名先行馳赴懷遠迄今已逾半月諒早趕抵該處本日復據福濟奏懷宿蒙城等處需用馬隊甚急至今未到著英桂迅將前項馬隊五百名交協領關保星速啟程帶赴蒙城以資勦辦毋許藉詞推諉再致遲誤將此由六百里諭令知之○命提督銜安徽壽春鎮總兵官鄭魁士會同河南巡撫英桂勦辦捻匪福建提督秦定三會同安徽巡撫福濟勦桐城賊匪○以安徽廬鳳穎各

州縣民食維艱准撥銀二萬兩買米平糶○丙寅命伊犁領隊大臣勝保發往安徽軍營交福濟差委○丁卯文謙以病免以海瑛爲貴州布政使清盛爲雲南按察使

由甘肅蘭州道遷

○以前任陝甘總

督易棠節次捐餉永廣湖南善化縣文武學額各一名○以收復貴州安南普安縣城並興義貞豐解圍賞知州蔣時涓花翎餘升敘有差○戊辰諭內閣御史李鶴年奏獲咎大員恐難復膺重任

一摺陸應穀前在河南巡撫任內辦理軍務未能實力防勦罪有應得業經罷斥茲因該員久歷外任是以賞給四品頂帶補授直隸按察使以觀後效向來緣事斥革人員棄瑕錄用仍能奮勉圖功者亦復不少況直隸旣非軍務省分臬司專理刑名亦非統轄全省朕進退人才一秉大公如果陸應穀不知振作仍不難重治其罪豈得以曾經獲咎人員逆料其必有貽誤概令終身廢棄耶

該御史所奏著毋庸議○諭和春奏親督官兵進攻句容連獲勝仗一摺句容逆匪憑城堅守十月十九日和春同張國樑等督率兵勇分途進攻逆匪大股出巢來撲並分股鈔襲我軍後路官軍三面羈擊和春身先衝突立斃悍賊三名餘賊驚潰二十五二十七等日該逆分股出撲張國樑督領官兵連開大礮擊倒執旗黃衣悍賊數名餘賊退下我軍三路追殺斃賊四五百名砍斃騎馬賊數名賊勢大潰此次官兵移營前進連獲勝仗斬馘多名著卽乘勝進攻迅圖克復毋稍延玩○諭軍機大臣等和春奏督兵親攻句容連獲勝仗並鎮江溧水剿匪情形前因皖南緊急諭令和春撥精兵三四千名飭傅振邦帶往甯國一帶會同鄧紹夏相機力剿溧水一路另派得力大員督辦茲據和春奏接得浙江緊信因傅振邦未便更易已調兵勇千餘名由溧水軍營另派得力將

弁管帶赴東壩會合堵剿傅振邦既畱溧水著卽趕緊攻剿力圖克復此次和春親督各軍連攻句容斬賊甚多該大臣身先將士不避矢石實堪嘉尙惟身爲統帥舉動須出萬全不但以衝鋒陷陣見長該大臣務當於奮勇之中加以慎重十九日出隊雖受傷尙輕殊深繫念著發給如意拔毒四料趕緊敷治就痊以慰朕望將此由六百里諭令知之○己巳諭內閣庚辰長奏請試辦開墾海口淤灘一摺黃河海口兩岸淤灘均係曠土可資耕種該河督請設法招墾以裕經費尙屬可行著遴派妥員前往查勘所有該處附近民田蕩地務須分清界址毋許侵占以杜流弊俟試辦有效再行酌議章程具奏其豐北蕭南二廳以下河灘隙地亦著委員清查一體酌辦○庚午諭內閣何桂清奏甯國官軍連獲勝仗一摺甯國逆匪負隅日久十月二十三日復有大股賊黨自柿木鋪

等處來援鄧紹夏派兵堵截援賊於楊柳鋪等處結壘二十四日
鄧紹夏親督隊伍往剿該逆被擊奔潰鄧紹夏以夏家渡賊氛日
熾二十五日親往督戰斃賊二百餘名其圖竄入城之賊適與副
將周天受派往援兵相值被殲千餘名賊仍不退鄧紹夏將領陣
賊首擊斃賊眾大潰被殲及溺死者不計其數此股賊匪以數萬
之眾來撲鄧紹夏調撥兵勇分投截剿七戰皆捷實足以視賊膽
著速將夏家渡一股掃蕩即可克復甯郡所有此次出力員弁著
何桂清查明保奏其扣畱浙省各營武職各缺並著照何桂清所
請准其以皖南管帶浙勇之川楚將弁升補○發楊文定往軍臺
效力○辛未諭內閣大學士文慶人品端粹器量淵深辦事精勤
通達治體渥承 皇考宣宗成皇帝知遇由翰林游陟卿貳在軍
機大臣上行走緣事罷職旋即起用擢任正卿朕御極之初復因

案獲咎念其平日服官謹慎特命督辦 昌西陵工程悉臻妥協

擢授戶部尚書正值辦理軍務籌畫度支克盡心力上年秋復命
爲軍機大臣旋授大學士仍管理部旗事務綸扉襄贊夙夜宣勞
深資倚畀前以偶染微疴給假調理方冀卽日就痊遽聞在園寓
溘逝悼惜殊深昨日已賞給陀羅經被並派貝勒載治帶領侍衛
十員前往奠醑本日披覽遺章彌深軫惻著加恩晉贈太保照大
學士例賜卹並賞給廣儲司銀一千兩准其入城治喪本月二十
六日朕親臨賜奠任內一切處分悉予開復應得卹典該衙門察
例具奏用示朕眷念盛臣至意尋予祭葬諡文端○大學士兩廣
總督葉名琛奏九月中因水師兵勇在划艇內拏獲盜匪李明太
等英國領事官吧嘎哩藉端起釁輒駛入省河將獵德礮臺肆擾
又在大黃窖礮臺開放空礮自九月二十九日至十月初一日攻

擊城垣縱火將靖海門五仙門附近民房盡行焚燒初一日又糾約二三百人扒城經參將凌芳與紳士歐陽泉等迎擊跌斃多名初九日復由十三行河面駛至直撲東定礮臺經兵勇轟壞兵船並斃其水師大兵頭哂嗎嚟咯哩見在堅守舊城調集水陸兵勇二萬餘名足敷堵剿紳民等亦同矢義憤奏入諭葉名琛相機妥辦並將陣亡撫標中軍參將凌芳交部加等從優議卹○壬申諭軍機大臣等據御史宗稷辰奏黔楚道梗通政使嚴正基係嚴如煜之子熟悉苗情請飭該員回湖南揀率鄉兵土勇出偏橋進剿並飭四川兵與湖南兵密約夾攻等語嚴正基雖熟悉苗疆形勢但年力漸衰未必卽能得力所請令其管帶兵勇之處著毋庸議至謂湖南大路宜扼偏橋其徑路如鴉喇關等處溪河直通麻哈八寨並三廳五峇皆有山路可通宜用前明朱雙元五道並進之

法與今日情形是否相合貴州兵力單薄自應川楚合剿以期迅速藏事著吳振械恆春蔣蔚遠駱秉章按照該御史所奏體察形勢相機剿辦如果川楚兩路各出奇兵分攻腹背再以黔省主兵與客兵併力殲除則辦理當易得手總宜不分畛域悉心籌畫原摺片均著鈔給閱看將此由五百里各諭令知之○論本日據胡林翼奏襄樊匪眾敗竄見飭兵勇約會川豫兩軍合力兜剿一摺襄陽匪徒本係烏合之眾因兵勇先潰以致賊勢日張雖經官文等派兵剿擊獲勝而襄樊之賊竄踞鄧州南陽新野亦有賊蹤必須楚豫兩省大兵合力兜剿剋期撲滅方不至蔓延北竄既據胡林翼奏舒保等所帶馬隊唐訓方之訓勇均屬得力卽著督飭該員等會同總兵德恩三面合擊以期一鼓殲除其隨州土匪並著嚴飭參將文明等迅速掩捕毋許觀望至鹽法道常恩係官文特

派帶兵剿賊之員何以遷延不進致有貽誤是否託詞患病希圖掩飾已革遊擊溫發魁師行無備委棄軍械爲賊所得顯有畏葸逃避情事著該大臣等確切查明嚴參懲辦以儆怠玩而肅戎行將此由四百里各諭令知之○命戶部尚書柏俊在軍機大臣上行走○癸酉調翁心存爲戶部尚書周祖培爲吏部尚書朱鳳標爲兵部尚書由戶部調○甲戌諭軍機大臣等德興阿翁同書奏逆匪窺伺江浦六合見籌撥兵助剿一摺江浦縣城日久尙未克復該逆欲圖竄擾浦口六合以牽掣揚營後路已非一日此次據報沿江下駛之賊多至數萬是浦口一軍甚爲喫緊該大臣等撥出馬隊一起兵力未見甚厚亟應乘其初到之時奮力急擊使不得與城中之賊併爲一處並將江浦縣城力圖克復方能保固揚州後路若徒爲添兵保守營盤之計則前顧瓜州後顧浦口徒見分兵

益形力絀況瓜州之賊時刻思竄該大臣既調回蘊秀援徐之兵亦應設法進攻計圖克復未可曠日相持致令上游之賊時萌覬覦之心至焦山等處水師缺餉已及五箇月當此攻剿喫緊急宜速籌接濟俾免兵心渙散著怡良趙德轍飭令該省軍需局速行籌畫水師兵餉解交京口糧臺陸續支發毋再遲誤前據怡良等奏火輪船業已豫備何以久泊上海屢改行期此時江面賊船絡繹下駛且有木筏多架正需輪船協剿若任令耽延豈不坐耗經費著怡良等卽飭帶船將弁迅速起碇催駛入江以資攻剿將此由六百里各諭令知之○丙子諭軍機大臣等福濟奏懷遠捻氛猖獗急須馬隊助剿並請仍飭察哈爾官兵速赴桐城等語前據英桂奏豫省東南兩路剿匪喫緊除飭伊興額關保原帶馬隊五百名先赴懷遠其察哈爾官兵五六百名暫畱助剿俟情形稍鬆

再行分撥復據邵燦等以徐州較蒙宿尤爲緊要請將伊興額仍
留徐營並將袁甲三截留該侍衛所帶馬隊二百五十名調回當
經諭令該漕督等以伊興額原帶馬隊業已派赴懷遠未便折回
茲據福濟奏徐郡城圍已解仍懇令伊興額馬隊二百五十名帶
赴懷遠一帶與關保合力剿辦自應移緩就急俾蒙懷得此勁旅
迅就肅清邵燦庚長務宜不分畛域飭將此項馬隊飛速調往其
察哈爾馬隊六百名並著英桂交穆騰阿帶赴桐城毋得各執意
見藉詞延誤將此由六百里各諭令知之○丁丑諭內閣何桂清
奏甯國官軍續獲大勝埽平逆壘一摺逆匪糾聚黨與來援甯國
先經官軍七次大捷斬馘數千仍復分踞險隘結壘固守十一月
初一日鄧紹良親督副將蕭知音遊擊葉鳳高等分攻夏家渡左
右殲賊四百餘名奪壘六座知府仲孫懋等攻入團山賊壘正在

鏖戰鄧紹夏復從夏家渡繞至縱火轟燒賊眾潰竄官軍轉戰而東復破逆壘二座斬獲首級二百七十三顆生擒三十七名是日夜間全軍進攻七里岡賊巢先破其山前兩壘遂分兩路衝殺上山該逆紛紛敗竄其自城內出援之賊復經分兵截回全軍直偪山南賊勢不支棄壘逃逸被殺無算官軍追出雙柑埠二十餘里沿途復俘斬一千六百餘名餘賊皆向南陵青弋江而遁賊壘十六座悉數踏平經此次痛加剿洗賊援已絕甯國逆匪勢成孤立各營將士同心勦力甚屬可嘉著鄧紹夏乘此聲威妥爲激勵迅將郡城克復以杜上游逆匪窺伺之計毋再遲延○戊寅冬至祀天於園丘○駱秉章奏自七月後道員劉長佑知府蕭啟江各率所部分路進偪袁城大小數十戰均有斬擒逆賊堅踞未能痛加剿洗因思自古攻城諸法雖多總以斷接濟覓內應爲主屢

令劉長佑蕭啟江善爲籌辦旋據劉長佑稟稱城中米糧尙多油鹽漸就匱乏八月十一日賊於南門外嶺上築大營一座意圖通南路接濟劉長佑蕭啟江等督勇一鼓平之是時分宜上高之賊窺蕭啟江等營均會攻袁州遂率股匪四千餘人乘虛攻撲萬載遊擊田興恕會商萬載縣知縣李吉言率兵勇禦之斗門陣斬僞指揮艾春榮斃賊約三百餘人自是賊不敢復窺萬載八月二十九日吉安有賊三千餘人攜油鹽子藥將由彬江赴袁蕭啟江等晝夜伏兵隘口截之燒毀賊船十二隻追至昌山而返九月二十五日臨江吉安援賊六千餘人復由分宜昌山分三路長驅而來劉長佑蕭啟江等亦分軍三路截之賊遂大潰竄入分宜二十六日袁城之賊四門齊出意圖撲營官軍俟賊偏近奮力轟擊賊大驚潰逸賊之從左路出者亦隨之而敗官軍先派出獅陂峽者甫

抵峽口卽與右路賊遇府經歷陳鈞和千總余謀忠同時遇害知縣劉坤一等督勇從厚田馳救蕭啟江亦分軍入陣賊遂反奔城賊聞之喪膽自是始謀棄城逃竄更番出城攻撲官軍營盤均被擊退賊遂潰走分宜十月二十四日劉長佑蕭啟江復派隊夜襲分宜距城里許賊方驚覺官軍大呼衝殺賊啟東門逸去立復縣城自是賊之外援盡絕而城中兩月以來油鹽旣斷米糧火藥日匱劉長佑蕭啟江會商賊已困極盡力環攻以擾之一面射示城中長髮賊能殺廣賊投誠者免其死廣賊能殺長髮賊投誠者亦如之賊首各懷疑懼多冒死出投者我兵攻城益急二十七日忽城中賊目李能通率黨十餘人出降城中驚擾益甚劉長佑派隊潛伏各路截其竄逸一面督隊猛攻十一月初一日僞檢點黃毓生率死黨潛由東南門逸出伏兵急起擊之旋卽驚退入城李能

通報知官軍約啟西門以待劉坤一督勇奪門而入見賊卽殺城下官軍紛紛梯城而上賊由南門突出墜城死者不可勝計僞檢點黃毓生以死黨百餘斷後甫行里許官軍追及楚勇胡盛久等四人擒之以歸其東南路繞竄逃逸者被官軍前後夾擊共計各路斃賊五千餘人投誠者二千六百餘人立將袁州府城克復降賊李能通密屬其黨開門延納官軍其贖罪之誠尙屬可信疊奉諭旨凡賊中自拔來歸者准其免死應卽欽遵辦理以普皇仁此次官軍疊克堅城勞績卓著江西卽補道劉長佑等謹先行開列請獎陣亡之江西補用府經歷陳鈞和等請飭部分別議卹其餘出力員弁兵勇可否容臣聚明勞績彙入克復萍鄉萬載兩案奏懇恩施 上諭內閣官軍疊獲大勝克復袁州分宜郡縣兩城劉長佑等經略秉章派令赴援江西五月之中前後數十戰殺賊

萬餘遂能克復堅城盡殄羣醜實屬奮勉出力卽補道劉長佑著
賞加按察使銜並賞給該員父母三品封典知府蕭啟江著賞加
道銜並賞給該員父母四品封典知縣劉坤一著以直隸州知州
卽選並賞戴花翎遊擊田興恕著以參將仍畱湖南補用其餘出
力員弁兵勇著駱秉章查明彙入克復萍鄉萬載案內從優請獎
陣亡之府經歷陳鈞和著照府經歷從優議卹千總李光祝著照
守備例從優議卹余謀忠著照千總例議卹把總任開元著照把
總例議卹外委石大美著照外委例議卹李能通身陷賊中卒能
自拔來歸著畱於軍營效力俟續有勞績卽行保奏○諭軍機大
臣等貴州地方年來匪徒充斥皆因守土各官不能潔己愛民以
致釀成事端重煩兵力上年銅仁松桃失守經湖南官兵越境克
復旋又被匪圍攻茲據駱秉章奏楚軍赴黔攻克三元屯三角莊

等處匪巢銅仁府縣屬境漸就肅清所有搜捕餘匪及一切善後事宜非鄰省所能代辦著蔣霽遠迅卽遴委廉明府縣飭令剋期赴任以資治理不得以庸劣之員濫竽充數將此由五百里諭令知之○以疊次援剿鄰省賊匪出力賞湖南巡撫駱秉章花翎○駱秉章奏此次援剿江西臣原擬分三路一由北路出瑞州一由中路出袁州一由南路出吉安方可漸期得力至吉安原應添派一軍以取建瓴之勢無如中路袁州兩軍人數已逾九千口糧欠至百日實不能再籌一軍之餉前蒙垂詢道員王鑫如病能全愈飭令由茶陵州進剿蓮花廳一帶以資策應時王鑫病尙未痊未便促其前進比王鑫病愈而石逆上竄武昌遂飭王鑫率勇赴岳援剿前羅定協副將周鳳山適來省稟請募勇復赴江西剿賊臣以其久經行陣飭募道州勇二千餘名兵部侍郎曾國藩之胞弟

同知銜優貢生曾國荃亦收集前甯紹台道羅澤南部曲及湘勇之在營告假歸籍者千餘人益以新募之勇共二千名請赴江西討賊臣卽先後札飭周鳳山曾國荃由江西萬載萍鄉前進合剿安福直擣吉安其所以不由茶陵州進剿者蓋由茶陵出境次第攻取蓮花廳永新永甯諸縣道路迂遠賊得嚴爲之備不若由萍鄉進攻安福卽可徑抵吉安似與三路援江之議相符於大局不無小補報聞○己卯諭內閣禮部等衙門奏遵議 文昌帝君升入中祀典禮開單呈覽一摺 文昌帝君升入中祀前期一日著遣親郡王行告祭禮春秋二祭俱著卜吉舉行二月初三日聖誕卽照 關帝聖誕拈香禮節並無庸禁止屠宰一切禮儀祭品樂章祝文均著照所議備辦應行酌改工程及豫備各項著工部於明年春祭前趕緊辦齊以昭誠敬○諭英桂奏官軍攻剿襄樊匪

徒連復大勝克復鄧州等語襄樊匪徒經楚軍擊敗後竄至河南
新野縣連陷鄧州經英桂飭令總兵廣德邱聯恩候補道周煦徵
先後督兵前往剿辦本月初七日邱聯恩等由鄧州之七里河前
進賊隊突至我軍併力迎敵連開大礮斃賊百餘名立將土城克
復初八日邱聯恩等親督兵勇進攻賊眾奪圍而出邱聯恩何懷
珍分路截剿追抵刁河經豫伏河口員弁率領練眾殺斃賊首及
餘匪數十名生擒賊首賊目七名當將州城克復辦理尙爲得手
著卽嚴飭邱聯恩等會同湖北陝西各軍乘勝進攻新野等處賊
匪盡殲醜類毋畱餘孽○諭英桂奏大兵進剿擒匪攻破雒河老
巢乘勝追殺直抵臨渙集一摺擒首張落刑等竄集花溝集宮吉
寺賊巢經我軍於九月三十日攻毀殲斃紅衣賊目數名匪黨一
千餘名敗匪仍屯踞雒河集等處穆騰阿崇安等於十一月初一

日督率馬隊分翼鈔撲過河佐領綽克圖達賴直前衝突崇安朱連泰等步隊繼進該匪分股逃竄共計斬殺落河淹斃首夥賊匪二千餘名立將雉河賊巢全行焚毀一路追殺直至臨渙集殲賊後隊五百餘名該匪過會河橋我軍趕殺三百餘名落河淹斃無數此次剿擒破賊老巢追殺二百餘里亟應乘勢進剿見在鄭魁士卽日帶兵前來著英桂會同該總兵督飭各軍迅將廟集麇聚匪黨全行殄滅毋再玩延○諭軍機大臣等英桂奏擒匪大股與官兵抗拒需馬隊衝擊請將關保所帶馬隊暫畱豫省幫同穆騰阿等馬隊進剿並請飭催郝光甲迅來蒙城等語英桂與福濟勦辦皖豫擒匪自應察看何路緊要和衷商權調兵策應乃關保所帶馬隊前據福濟奏調蒙城本日復據英桂奏畱豫省楚致靡所適從蒙懷一帶福濟則奏稱擒勢日張而英桂則謂該處情形並

不喫重亦復各執一詞以致難辦機宜漫無把握迨至有誤事機亦復互相諉過見已派鄭魁士會同英桂剿辦捻匪三省官兵均歸節制皖豫捻匪事宜責有攸歸福濟既遠在桐城毋庸處處過爲遙制鄭魁士接奉前旨諒已馳至蒙懷一帶務與英桂悉心商酌關保所帶馬隊是否應赴蒙城抑仍須畱於豫省穆騰阿所帶察哈爾馬隊六百名應否仍遵前旨馳赴桐城均著鄭魁士會同英桂體察緩急情形斟酌調派至英桂所參郝光甲始終株守懷遠一節並著鄭魁士到後會同英桂查明辦理英桂見又株守亳州不趕緊前進諸軍之優劣何以知之到處必得旨催汝何厚顏若是耶至前請撥山陝兩省銀各十萬兩經部議以山陝撥款過多於山東應解京餉項下劃撥銀十萬兩解豫此係有著之款並未據崇恩覆奏英桂何以知其不能籌解仍請由山陝改撥殊不

可解本日已諭崇恩籌款陸續撥解矣至河南協濟皖省米麥折價銀兩兵糈攸關卽應趕緊籌措若俟明年上忙開徵豈復濟急之道著英桂剋日籌款解赴廬州毋許藉詞推諉於鄰省緩急漠不關心將此由六百里各諭令知之○庚辰 上臨故大學士文慶第賜奠○諭軍機大臣等王懿德等奏閩師援剿建昌失利署副將陳上國等力戰陣亡張從龍琳潤等見在飛鸞杉關扼守各情此項閩兵赴援建昌節次攻剿獲勝茲因該逆勾結撫州宜黃股匪內外夾攻致遭挫敗杉關飛鸞等處爲江閩交界要區王懿德以閩兵新敗暫令該副將等固守邊防俟江西撥兵來援再行會合進剿見在將軍福興已帶兵一千名由浙江前赴江西不日當可到省該將軍或卽帶兵前赴建昌與張從龍等兩路夾攻著曾國藩文俊與福興妥商辦理福興未到以前如江西省另有兵

勇可分亦著該侍郎等迅速調派應援毋令匪勢更增猖獗至閩省近因順昌等處匪徒滋擾內患未消王懿德等務飭張從龍琳潤力扼要衝勿令匪蹤闖入以致勾結爲患俟曾國藩文俊派兵到日卽令該副將等夾攻兜剿以戰爲防是爲至要將此由六百里各諭令知之○辛巳諭內閣大學士文慶溘逝業經降旨優加賜卹昨日朕親臨賜奠見其遺孤幼稚親支人丁稀少殊深愴感因思文慶人品醇正奉職勤能宣力有年靖共夙夜著加恩入祀賢良祠伊子監生善聯俟及歲時由該旗帶領引見伊弟已革都司文玉見在遣戍著卽釋回以示朕眷念盡臣推恩優渥至意○諭軍機大臣等怡良何桂清奏火輪船入江請暫行停緩等語此時冬令水落船行既多不便又因粵東滋事夷匠難招著准其暫行停緩俟明年春漲足資浮送察看夷情安帖卽可催令入江不

必俟粵事全定始行辦理○壬午官文都興阿楊載福胡林翼奏
八月初七日追剿逆賊石達開後因攻城未下徒傷精銳添募陸
勇五千添建水師六營水師護軍四營爲長圍坐困之計以遊擊
張寅恭領九營扼青山之要而以團練四千人伏於村外以參將
張榮貴領四營扼守石觜之要以團練四千人助之其長濠各寬
二丈深如之外護土城臣胡林翼五里墩之營與李續賓洪山之
營繼長增高濠亦加深其魯家巷之濠壘高深各二丈餘以遊擊
趙克彰等統之賊之米糧旣斷信息難通至十月十五至二十三
等日疊次奔突翼得一逞臣等四路營壘排礮轟擊每夜必傷賊
數百二十六日臣楊載福率水師七營並護軍四營進攻武昌鮎
魚套漢陽南岸皆賊船參將王明山等以水師由南岸觜溯流上
擊把總丁泗濱等以水師由塘角至黃鶴樓過江從上下擊遊擊

陳金鼉等由江之中流直上擊賊之腰賊之沿江陸壘礮子如雨
王明山首先衝入右手已被火箭燒傷血戰不退陳金鼉等繼進
其丁泗濱一軍從上衝入宋美富等繼進賊不能支奪燒賊艦二
十餘隻輜重船三十餘隻王明山獨奪三板五隻丁泗濱獨奪三
板一隻長龍一隻賊船焚燒殆盡十一月初五至十四日賊分股
各一二十人出戰夜襲我營均經我軍擊敗十五日賊分四路各
出六七千人背城決戰臣令同知邢高魁等各路進剿殺賊一千
餘人賊奔入城臣官文偵知賊勢日蹙咨會臣等水陸剋期大舉
臣楊載福與李續賓卽定水陸合剿之計二十二日水師分上下
夾攻以六營自上下擊而以楊明萬之大戰艦爲先鋒以七營自
下上擊而以周清元之大戰艦爲先鋒臣楊載福自行督陣指揮
是日乘風破浪左右轟擊將賊之闌江鐵鎖砍毀賊船逐一焚燒

片帆無存賊計已窮乃於已刻洞開各門一股由塘角撲青山之營張寅恭率各營禦之一股由花園撲石嘴之營張榮貴率榮宇左右兩營禦之周瑞率安勇橫鈔之一股由八步街繞出五里墩大營同知邢高魁葉永泰率訓導李景湖鄒漢章都司楊德武等五營禦之一股由長虹橋直撲五里墩大營守備胡連萼等五營禦之一股由小龜山撲洪山之右一股由寶湖隄撲洪山之左一股由嶽廟撲洪山之前李續賓以參將周寬世等營勦右路以國子監典簿蔣凝學等營勦左路以遊擊胡裕發率相副左營隨李續賓自帶之湘右營勦前路以參領富新率馬隊百名助之又飛調魯家巷兩營及東南兩湖水師爲策應待其逼近突擊鏖戰三時之久士氣奮厲賊始大敗狂奔諸勇乘勝猛追午時收復武昌省城殺斃溺斃燒斃賊匪約一萬餘名生擒僞檢點古又新賴集

恩僞指揮周宏元僞將軍陳得篙鄧侍俊黃開發等及先鋒黨與八百餘名當卽誦誅生降四千餘人俟訊明是賊是民分別辦理其城內應辦安撫事宜並上年二月死事忠骨由臣次第清釐另行奏報查武漢旣已同日克復臣當檄水陸各營交楊載福李續賓統率卽夜分三路追剿期與團練合力盡數殲除又探得江西義甯竄匪六千餘人屯聚興國州境擬派兵直下武昌縣及大冶興國等處並力勦斬黃以冀全境肅清布政使銜候補道安慶府知府李續賓功績最偉管帶馬隊參領富新奮勇當先可否均懇皇上恩施其餘在事出力文武員弁兵勇容俟查明另行保獎上諭內閣胡林翼奏官軍克復武昌省城由八百里馳奏一摺此股逆賊負隅日久經胡林翼激勵將士前後數十戰無不克捷遂將該城克復逆眾被殲淨盡辦理極爲得手自應立沛恩施以

昭懋賞在事員弁兵勇著胡林翼查明保奏○胡林翼奏楚勇出
省打仗昉自前安徽巡撫江忠源計每勇月支銀五兩及四兩八
錢不等嗣曾國藩奉旨幫辦湖南團防以本省鄉勇防本省地方
卽酌量覈減四年率師東征較團防章程加增視江忠源所發章
程仍大加覈減計每勇一名日支銀一錢五分長夫月支銀二兩
四錢臣到鄂後仍思覈減以節糜費惟業經支發年餘各勇又均
出力不得不仍前放給本年湖北錢米各價無不昂貴若再議減
實屬不敷食用合無仰懇 聖恩俯念楚勇尙爲得力所有臣營
水陸各軍仍准做照曾國藩原擬章程支給庶該勇等益知感奮
於勦辦大局實有裨益 上諭胡林翼所帶水陸各軍勦賊尙屬
得力見在該省錢米各價均形昂貴著准其仍照曾國藩原定章
程每勇每日支銀一錢五分長夫每月支錢二兩四錢以示體恤

○諭軍機大臣等據胡林翼馳奏克復武昌省城摺內所敘有武漢同日克復之語諒官文當已奏報在途如果南北兩岸均已肅清所有水陸各營自應分撥進剿卽已克之兩城亦應畱兵防守胡林翼見擬派兵直下武昌縣及大冶興國等處並力勦蕪黃以期肅清全境當此聲威甚盛諒此等零星竄踞之賊不難剋日掃蕩從此建瓴東下江西安徽兩省均關長江大局究應先從何處進剿近日江西撫建兩府官兵連挫湖南兵勇雖已克復袁州而崇通一帶終未一律掃除今又聞義甯竄匪屯踞興國是江西待援情形實爲喫重著官文胡林翼迅速會商卽將如何酌畱之處妥籌具奏所有善後安撫事宜並著該督撫悉心酌辦將此由六百里加緊各諭令知之○以克復湖北省城實授胡林翼巡撫並賞頭品頂帶賞總兵官楊載福提督銜道員李續賓等升補有差

○癸未官文奏武漢賊匪久踞七八月內石逆大股上犯經我軍力戰數次絕其外援我軍進紮要隘兼旬以來連獲勝仗十一月二十二日臣親赴五里墩分督各營進攻適外江水師由沌口直下沙口礮船駛上會攻臬司李孟羣分攻西南北三路城外賊卡翼長巴揚阿等率馬隊繼之副將顏朝斌等各督兵勇四面圍攻襄河內湖水師鄧清等均帶礮船轟擊該逆出數千人於東門外與大江水師對敵龜山五顯廟西門橋報國菴各賊卡礮子如雨我軍蛇行而進聞礮即伏數伏數起直抵濠邊總兵王國才親督兵勇拔其濠鐵或架雲梯或拋火彈燒斃賊匪不計其數臣探察五顯廟卡賊較少復派兵勇直越賊濠砍倒守牆數賊乘勢力破卡牆數重卡內賊匪剿殺淨盡維時龜山之賊欲來搶救李孟羣又分隊搶上龜山王國才督兵勇攻西門橋楊昌泗督兵勇攻報

國菴廣勇力攻南門一帶牆柵該逆面面受敵驚慌無措我軍斃賊二千餘人馬步兵勇直逼城下銳氣益奮於申刻將漢陽城池克復兵勇一擁入城與賊巷戰斃黃冠黃袍紅衣賊數十名斃夥賊二千餘人生擒偽將軍司馬旅帥五百餘名賊由東門逸出適遇顏朝斌大隊並前荊州將軍綿洵等各路伏勇分投擊斃者又三千餘名至江面賊船先經水師焚毀賊有從沙洲爭渡者復溺斃千餘人其有搶先上船之賊約十餘艘行至江心適暴風大作全行覆沒提訊生擒各賊僉供僞指揮劉滿僞丞相鍾逆被礮轟斃臣當飭王國才等於龜山西門橋等處紮營防守一面派兵渡江偵知武昌兵勇亦於二十二日克復省城查武漢逆眾踞守幾及兩載仰仗 皇上威福使兩城同日克復剿除逆賊鮮有漏網洵足伸 天討而快人心見擬撫綏遺黎會籌防守一面整師東

下容再次第奏報 上諭內閣昨據胡林翼奏官軍於十一月二十二日克復武昌省城本日復據官文由八百里馳奏同日克復漢陽殺賊無遺逆匪踞守武漢幾及兩年此次同日克復堅城逆賊罕有漏網所有在事出力員弁兵勇著官文會同胡林翼覈實保奏候朕施恩○諭孝順蔣蔚遠奏疊次剿賊獲勝並克復都勻府城一摺貴州自都勻失陷後提督孝順並參將巴揚阿分路攻剿節次獲勝十月初六日守備宋朝榮斃匪數十名城中疊次出賊抗拒經孝順巴揚阿分隊攻擊先後各斃賊數十名槍斃賊首二名割獲首級甚多二十五日兵練將南門外賊營攻破是夜由西北門攻進復斃匪數百名內有賊首多名生擒七十名府城當卽克復二十七日復拔剿賊匪均有斬獲其甌往凱口平浪及攻撲麻哈州之賊亦經官軍練勇疊次擊退殲斃無數仍著孝順等

督飭將弁分路攻勦將失陷各城次第克復毋再遲延○諭軍機大臣等孝順蔣霽遠奏攻克都勻府城請飭催靖永官兵進勦一摺前諭令駱秉章酌撥湖南靖永一帶官兵練勇由靖州赴援黎平嗣據該撫覆奏已調瀏陽東界之丁際可所帶靖勇四百餘名赴靖防勦惟該州兵力單弱未能越境等語自係實在情形見在黔省都勻賊匪雖已退聚八寨而麻哈匪黨尙在附近滋擾黎平僻處東南距貴州省城道里寫遠孝順等鞭長莫及駱秉章向來辦事不分畛域所派鎮筓兵勇業在銅仁屢獲勝仗靖州與黎平接壤有無兵勇堪以酌調赴援之處仍著酌量情形奏明辦理將此由五百里諭令知之○諭昨據胡林翼奏水陸大舉克復武昌省城當諭令該大臣等妥籌進勦本日復據官文馳奏同日克復漢陽賊匪斬殺無遺覽奏實深嘉悅已降旨加恩並令將出力各

員保奏矣我軍克復武漢已據長江上游惟安徽江西兩省賊勢未衰崇通一帶亦未一律肅清該大臣等固當乘此銳氣建瓴東下惟須將本境餘匪殄除淨盡然後分路下擊方不至有內顧之虞江面必須有水師扼截以遏賊船往來道士袱素稱險要但今昔情形不同該處見在能否駐紮水軍或此外另有險要堪以扼守陸路則崇通一帶匪蹤出沒亦應留兵防勦水陸兩軍位置妥協則水師據大江之險陸軍遏數省之衝該匪自無從竄越紛擾而兩城兵燹之餘撫綏不易務須慎選良吏安輯民人使不至流而爲匪則賊勢日孤軍聲益壯諒該督撫必能見及此也見擬由何路進兵是否胡林翼督兵在前官文在後路接應著卽妥籌具奏所請撥山陝等省餉銀已降旨交戶部速議具奏矣將此由六百里加緊各諭令知之○以克復漢陽賞湖廣總督官文花翎下

部議敘○是月蠲緩山西歸化城薩拉齊二廳江蘇太倉等四十
四廳州縣及蘇州等六衛湖南澧州等十一州縣及岳州衛被災
地方額賦山西托克托城廳山東濟甯等二十州縣暨東昌等四
衛地方被災額賦並賑災民一月口糧兩淮豐利等二十一場歉
區額賦並賑通秦二州被災竈戶展緩山東臨清等七十一州縣
並東昌等四衛甘肅狄道等十八州縣並沙泥州判所屬被災地
方新舊額賦吉林打牲烏拉被淹旗地額賦並賑饑民口糧

東華續錄

咸豐六十七

臣王先謙敬編

臣陶潛宣恭校

十二月甲申朔晉封 懿嬪那拉氏爲 懿妃○命已革江蘇巡

撫許乃釗留辦浙江協防事宜○乙酉諭內閣載增等奏官軍克

復老河口大獲勝仗等語襄陽匪眾屢竄老河口盤踞焚燒勢甚

猖獗經署松潘鎮總兵德恩等督率兵勇鄉團攻剿前後擒斬匪

黨共二千餘名當將老河口鎮市克復辦理尙屬得手著該署將

軍等迅飭帶兵將弁將零匪搜捕淨盡毋畱餘孽所有前次穀城

光化二處剿賊出力員弁兵勇著載增等分別奏請獎勵傷亡弁

兵查明請卹○諭崇恩奏剿捕匪徒殲除殆盡一摺山東兗曹等

處匪徒王三托盤背等誘脅饑民糾聚黨與數千人由水路竄至

濮州鉅野一帶經崇恩派令荷澤縣知縣童正詩等會合各路兵勇攻剿立時撲滅辦理尙屬迅速惟首匪王三托盤背陶三尙未拏獲著崇恩通飭各屬嚴行投捕並著桂良英桂一體飭屬緝拏務獲毋令遠颺○諭軍機大臣等前因隨州土匪蠢動諭令官文等速飭帶兵員弁進剿見據載增等奏稱該匪在隨州洪山嘯聚經官軍擊退後復分爲三股聚至數千於二十日竄至安陸府望城岡官兵接仗潰敗等語該匪以烏合之眾何至遽行猖獗見在安陸府居民遷徙已空能否固守載增等尙未探明而匪勢實已蔓延襄河上下游及荊門等處均形喫重自應亟籌撲捕官文等前次派出帶兵往剿之參將文明應卽星速前進與署漢黃德道文輝商同剿辦或兵力尙屬不敷見在武漢克復必可分兵援剿著官文胡林翼速行籌撥務將此股土匪迅速殲除毋任滋蔓並

著載增飭令協領全瑞查看情形帶領防兵迎剿以期早爲蕆事
至安陸府城文武能否實力守禦不至失事之處並著官文等查
明馳奏將此由六百里各諭令知之○丙戌 上詣 大高殿祈

雪○諭內閣赫特賀滿慶奏廓夷進表輸誠邊界一律肅清一摺
此案廓爾喀夷人因挾稅米買鹽細故輒稱唐古忒有意侵陵稱
兵犯界占踞聶拉木等處邊隘肆意要求朕念該國久列藩服向
來恭順此次與唐古忒構釁不過邊徼蠢愚罔知大體特命赫特
賀赴後藏協噶爾地方勦撫兼施曉以利害並諭滿慶於前藏一
帶妥爲布置仍密授機宜隨時指示該大臣等均能仰承朕意威
德並行自聶拉木等處官兵疊勝以後該夷悔罪畏威撤退各口
番兵求與唐古忒和好茲復據赫特賀奏報該國王奉表輸誠懇
求赦罪察其情詞尙爲肫切自應予以自新寬其既往著赫特賀

等傳諭該國王嗣後但當謹守藩封與唐古忒永敦和好毋以小嫌微隙再起爭端以仰體朕柔遠推恩一視同仁之意赫特賀辦理此案調度尙合機宜著加恩賞加都統銜並賞戴花翎滿慶虛衷商辦持以鎮靜著加恩賞戴花翎並交部議敘所有一切善後事宜仍著該大臣等妥籌辦理以靖邊圉○諭軍機大臣等和春奏請飭撥火藥等語江蘇句容溧水等處攻剿正當喫緊需用軍火甚多該省餉銀支絀採辦維艱亟應豫爲籌撥著崇恩迅速籌撥火藥四萬斤桂良王慶雲譚廷襄各籌撥火藥三萬斤仍各按照火藥斤數各配鳥槍子火繩七成迅速分起委員趕解和春軍營以資攻剿而應急需毋稍延誤將此由六百里各諭令知之○諭和春奏請飭迅揀司道大員會辦大營糧臺等語江南糧臺收放事宜前經諭令怡良等揀派公正大員督辦茲據和春奏稱業

經怡良等派已革江蘇臬司查文經辦理惟迄今兩月尙未前往
且係革職人員深恐呼應不靈自屬實在情形所有江南大營糧
臺籌給糧餉稽查報銷在在均關緊要著怡良趙德轍仍遵前旨
速揀公正明幹實缺司道大員前往督辦以重軍實和春另摺奏
兵勇缺餉數月請飭各省速籌接濟一摺已批令戶部迅速籌撥
具奏矣惟外省撥解需時緩不濟急江蘇省見值旱災庫款十分
支絀亦諒非該督等敢於膜視惟當此攻剿喫緊之際豈容停兵
待餉致誤事機蘇省各屬錢糧除蠲緩外尙有照常徵收之處此
外關稅抽釐勸捐各項皆可以資協濟著怡良趙德轍悉心籌畫
設法接濟儻有貽誤惟該督撫是問懍之至和春進攻句容雖經
獲有勝仗而城池尙遲克復務當督率將士奮力攻圍先克句容
溧水以便直搗金陵當此餉糈支絀之時尤當迅速圖功早克一

城即可省一處之兵力未始非節省經費之道將此由六百里各諭令知之○駐藏大臣赫特賀等奏報廓夷悔罪輸誠得旨覽奏實深欣慰赫特賀辦理此案調度合宜用彰我武滿慶虛衷商辦持以鎮靜雖事事遵循朕旨實賴爾等公正果斷不至兵連禍結此次用兵固不同乾隆年事然較彼時帑餉支絀勢有萬難者也又批廓爾喀邊徼藩封向來恭順雖稱兵於前不過因小釁而昧大體今既悔罪奉表足徵該國王尙能仰體朕一視同仁之至意朕心甚爲嘉悅繼自今永保藩封與唐古忒萬年和好卽爲有福能承朕恩也著赫特賀將此硃諭傳諭該國王知之○以善燕署正黃旗漢軍副都統調麟興爲盛京工部侍郎以崇綸爲工部左侍郎由內閣學士遷○丁亥陶樸以病免轉車克慎爲禮部左侍郎以楊式穀爲禮部右侍郎由內閣學士遷○追予廣西殉難知縣李慶福祭葬

世職○以訥爾濟爲左副都御史

由通政使遷

○己丑諭內閣湖北武

昌漢陽兩城疊被賊踞附近各屬亦多被擾之處見經官文等督

兵克復城池地方漸就肅清閭閻當兵燹之餘元氣尙難遽復自

應亟籌調劑以恤民艱著官文胡林翼卽將武昌漢陽兩府屬被

賊擾害地方錢漕正雜各項應如何分別蠲緩迅速查明具奏其

被難貧民亟應籌款妥爲安撫並著遴委妥員迅速查辦該督撫

務當悉心籌畫俾無一夫失所以副朕軫念民依恩膏速沛至意

○以克復武昌漢陽賞將軍都興阿協領巴揚阿巴圖魯名號按

察使李孟羣布政使銜總兵官楊昌泗提督銜復已革荊州將軍

綿洵提督孔廣順總兵官訥欽職餘升敘有差○辛卯官文都興

阿楊載福胡林翼奏

臣

胡林翼檄飭木陸各營交署提

臣

楊載福

候補道李續賓總統於十一月二十三日分三路追剿一軍由窯

灣東興洲進一軍由雞窩胡家墩進一軍由魯家巷葛店進各有
斬擒賊遂左右亂竄我軍沿途投殺及於樊口賊爭先渡水急將
浮橋燒斷其未及渡者又殲四百餘名敗賊復糾武昌縣城之賊
踞城西之山岡以圖抗拒李續賓率勇夜造浮橋乘勢攻取橋成
而楊載福水師亦至李續賓率各營以攻賊壘李濟清率水師由
城北面登岸齊力攻城隨由北門攀躋而上李續賓率陸勇由西
門入賊卽由東南門竄出諸勇由羊欄湖追殺十餘里而返於二
十四日克復武昌縣城武昌縣對江爲黃州府楊載福率水師先
於二十四日申刻將黃州城下賊船盡行焚奪李續賓令各營於
四更渡江二十五日賊見水師泊岸不慮我陸師之夜渡也遂出
賊二千餘人撲我水軍待其離城較遠伏勇突起賊眾大亂不能
入城我軍縱橫衝擊守城之賊驚惶無措水師亦繞道上岸從下

游入城於二十五日立將黃州府城克復至武昌縣城逸賊經參
領富新等率各營馬隊於二十四夜東下窮追李續賓於二十六
日仍由黃州渡江進剿興國大冶卽擬直入九江楚境似可剋期
肅清此次兩日之間追剿二百餘里連復府縣兩城實由馬隊將
領踊躍用命而道員李續賓參領富新等忠勇冠軍尤屬可嘉在
事出力員弁兵勇可否容臣查明保奏 上諭內閣胡林翼等奏
追剿賊匪獲勝克復武昌縣黃州府二城一摺見在富新率馬隊
東下窮追官文添撥馬隊渡江追剿李續賓進剿興國大冶楚境
卽可一律肅清著胡林翼等乘勝進攻盡殲醜類勿畱餘孽除李
續賓富新二員業經加恩外其在事出力員弁著胡林翼查明奏
請獎勵○諭軍機大臣等曾國藩文俊奏贛南匪勢蔓延請添調
粵兵會剿一摺贛南接壤粵境距江西省城道路爲遠見在定南

安遠信豐長甯崇義上猶等廳縣均被鄰匪土匪勾結滋擾省垣
賴長英及雖賴郡尙有兵勇而沙石鋪等處賊匪未除不能分顧
外縣若不趕調客兵協剿誠恐逆黨勾通誘脅日見蔓延據該侍
郎奏請飭廣東籌撥勁旅三四千名隨時接濟餉糈取道和平徑
趨定南一帶會同江西省兵勇次第剿辦惟廣東近因英夷藉端
起釁是否息事罷兵未據葉名琛續報朕心方深焦盼未知該省
兵力能否足調三四千名之數著葉名琛迅速籌辦至此次派出
官兵應需軍餉並著由廣東籌給接濟以期早靖逆氛將此由六
百里諭令知之○諭胡林翼奏請飭四川將前撥軍餉全數速解
等語湖北水陸各軍並馬隊官兵乘勝追剿需餉緊要前諭樂斌
籌銀十數萬兩解往胡林翼軍營僅據報解銀三萬兩尙未到楚
見在武漢克復大兵東下必須源源接濟以利軍行著吳振械仍

遵前旨迅籌銀十餘萬兩趕緊陸續撥解胡林翼糧臺見改設武昌省城此項銀兩著卽解赴糧臺毋稍遲誤將此由六百里諭令知之○曾國藩文俊奏自琳潤續帶閩兵抵建與省城之賴兵龍泉勇合紮北路建勇亦自新城回軍駐紮西北兵力較厚八月二十一至九月十三等日疊次攻剿均有斬擒自九月十七日撫州李元度之營被賊撲陷賊燄頓長建昌之局勢爲之一變據何栻張家駒稟稱李元度崇仁之兵撤調貴溪十月初七日賊匪卽入崇仁初十日又陷宜黃前僞監軍冷逆於初九日入金谿又於陷宜黃後擾及楓林神岡大雄關軍山以偏南豐陷金谿後擾及黃獅渡高陂以偏沈溪建郡地界四五十里面面皆賊十五日宜黃出賊二千餘人直抵岱七都十七日至規下距郡城三十里各營議定抽兵赴規下迎剿潛師夜出建營天明已抵規下楊錦斌揮

軍掩殺該逆措手不及緣崖逃竄兵勇追剿斃賊百餘何斌等以該逆必不因此一挫遂戢其鋒仍屬各營面面戒嚴二十一日楓林一路有逆匪七八千人前來張從龍派兵六百名往擊張家駒自帶壯勇三百名堵東路張大雄率賴標兵勇三百名爲接應二十一日行抵距城四十里之大安橋適與賊遇皆爲我軍擊敗正待窮追左右逆匪鈔出將我軍衝爲兩段先勝後挫把總蘇廷美力戰陣亡南軍併由東岸紛紛敗退是日賊卽撲至上湖橋下兩處距郡城三十餘里張從龍因南岸兵勇傷亡較多卽親督所部扼駐廟嶺張大雄連夜赴南岸助剿次日迎賊復戰該逆漫山塞野而來張大雄楊錦斌奮力掩殺將左右兩路擊敗中路賊亦退走正待收軍賊復掩至城內之賊探知外援已到出城接應將馬隊分兩翼包裹我軍困在垓心署閩安協副將陳上國截住南門

之賊我軍首尾不能相顧西北兩城之賊蠶擁而出琳潤正分投迎擊而南營敗卒紛紛由西奔回知南軍失利急於馳援乃會同拔營東行時已申酉之間南營張從龍張大雄楊錦斌始從重圍衝出賊馬攢追張從龍張大雄均受重傷副將陳上國等併入漳營在麻橋苦戰內外之賊併力交擊二十五日營中火起遂爲賊陷陳上國呂文烱丁開第同時遇害北軍福建兵勇退駐閩境之飛鳶自守南軍各營敗散甚多張家駒率龍泉勇由貴溪河口一路回省查撫建兩郡輔車相依撫營旣陷建昌勢難孤立加以師老力疲援賊新至鏖戰兩晝夜之久遂致挫失所有護閩安協副將陳上國深明大義力戰捐軀應請與同時遇害之把總蘇廷美守備伍連青通判呂文烱巡檢丁開第一併飭部從優議卹得旨陳上國蘇廷美伍連青呂文烱丁開第均著交部從優議卹○曾

國藩文俊奏石逆於甲寅八月踞守安慶十一月臣國藩師次九江石逆與羅大綱同赴湖口救援官軍被挫乙卯春武漢復陷該逆往來蘄黃一帶調遣賊軍十月由通城竄入新城招納廣東新附之匪連陷江西數府本年三月下竄蕪湖等處七月初九復由興國州上援武昌爲李續賓之師所敗見據各路探報石逆糾集匪黨十餘萬人前往金陵誓殺洪韋二賊爲楊秀青報讎以臣等愚見揆之如果洪韋勝而石逆敗則投誠乃意中之事若石逆勝而洪韋敗則該逆挾詭詐以馭眾假仁義以安民方且飛揚自恣未必遽有反正之心臣等曾檄諭九江賊目林啟容令其歸順又作僞文調瑞州賊目賴賴新令赴下游均無成效假令石達開自知大勢已去天威難犯稽顙投誠則臣等招撫之法當令其立功贖罪獻城爲質以大局言之北岸安慶南岸九江該逆之所必

爭也以江西言之瑞州臨江爲根本撫州吉安爲膏腴亦該逆之所不肯輕棄也能於此六城中獻一二城爲質則可信其真心歸附臣等立即奏懇恩施否則外稱歸義內懷叵測臣等亦不敢貪招撫之虛名弛防勦之實務是否有當伏乞訓示刻下瑞州奉新兩軍疊獲勝仗勦辦尙屬得手周鳳山等之師差稱勁旅水師則彭玉麟駐下游之吳城鎮劉于濤駐上游之樟樹鎮均甚得力惟撫建疊挫東路空虛臣等惟當嚴飭諸將恪遵諭旨先圖攻克數城使該逆無所憑藉得旨爾等主見甚屬允妥勦撫固應並用尤重先勦後撫可隨時審其機宜好爲之○曾國藩文俊奏據道員劉長佑等稟稱袁城之賊十分窮蹙於吉安糾合萬餘人齊踞分宜十月初三日夜前隊已到彬江次日我軍出隊下浦以待賊果屬至遂分頭迎擊又大敗之初八等日賊悉數駐紮合山築立土

城誓決死戰劉長佑等飛調遊擊田興恕一軍來袁助勦十三日擊賊於下浦賊潰轉守合山十六日蕭啟江田興恕等分三路進破合山賊巢斬奪無算積聚概行燒盡乘勢追逐距分宜僅十五里是夜分宜賊悉數遁去二十三日復有回竄者二十四日劉長佑派隊會勦收復分宜縣城賊援自此絕矣二十七日賊目李能通詣劉長佑軍中乞降十一月初一日遊擊劉培元率兵列陣楊家山城賊數千由秀江橋蠡擁而來我軍斃賊十餘名乘勝追至城下賊眾大亂初更時僞檢點黃逆率數十賊由北門出我軍恐其竄向萍鄉派隊堵禦該逆欲逃無路四更後賊多縋城出者我師併力攻之蕭啟江營勇斬縋城之賊而奪其索縋入急開北門以納諸勇西門內應之賊亦啟關以納劉長佑一軍賊悉向東南冒死突出我軍分路跟追逃賊殄滅殆盡城內投誠者二千餘人

立將袁州城池克復查湖南援軍圍攻袁州吉臨等處之賊盡銳以救袁城迨鄂軍圍攻瑞州又盡銳以救瑞城互相援應我之兵力已疲而賊之負隅如故臣等焦灼莫名茲幸仰仗天威袁州克復一郡得手全局自有轉機報聞○除吉林衝壓地八百五十三畝額賦○癸巳命降調四川總督黃宗漢以內閣學士候補○甲午諭內閣胡林翼奏歷陳湖北兵政吏治一摺湖北省自賊匪竄擾以來兵政廢弛吏治闕茸已非一日見在武昌漢陽均已克復善後事宜亟應次第籌辦該撫所陳裁汰募勇添設重兵嚴查保甲簡選賢員各事宜剴切詳明實爲今日要務著照所請所有該省汰勇事宜卽責成候補道魁聯嚴行簡練其武漢豫設水陸重兵爲扼守上游控制長江之計前已諭令官文籌辦卽著該撫會同辦理至州縣爲親民之官尤應嚴加遴選其懸缺地方如果

委署之員實能經理妥協才具出眾卽准其不拘資格專摺奏請
朕必破格錄用不吝恩施胡林翼身任巡撫於通省應辦事宜責
無旁貸既能確有所見卽著實力舉行總期遇事整頓俾地方日
臻完善毋得徒託空言始勤終怠○諭軍機大臣等福濟奏鄭魁
士兵勇不能抽撥見飭吉順金光飭帶兵赴北路等語前因鄭魁
士已抵巢縣特命秦定三赴蒙城與英桂會剿捻匪嗣因福濟請
將該提督畱於桐城朕念鄭魁士於蒙宿情形較熟是以允其所
請改派鄭魁士前往今北路剿匪正在喫緊而該撫復請畱鄭魁
士似此朝令夕更茫無定見必致南北兩路彼此牽制且所稱不
必徒博會剿之名亦未免意存畛域朕豈能因福濟此奏復行改
派惟該撫見既調派吉順金光飭分帶兵勇各五百名前赴北路
與前派鄭魁士帶往兵數尙足相抵所有鄭魁士一軍著准其暫

畱桐城一俟縣城克復卽日馳赴蒙毫不得再有耽延至所稱關
保所帶馬隊赴調遲延請摘去頂翎之處本日據英桂奏已飭該
營總由太和馳赴懷遠此項馬隊請畱請調彼此兩歧該營總亦
幾無所適從是否實有玩誤情節著英桂查明具奏英桂因循畏
蕙前已降旨嚴加申諭本日據奏攻破廟集賊圍一摺仍復枝梧
搪塞該匪旣挑壞築圍意圖死守官軍並未大勝何以卽行潰散
卽初二日夜間誘賊出戰亦未聲敘詳細情形顯係空巢夜竄崇
安等卽據以爲功又以人馬疲乏爲詞不卽窮追此等敷衍之詞
豈能逃朕洞鑒若再不能力圖振作迅獲渠魁朕惟執法從事不
能倖邀寬典也將此由六百里各諭令知之○諭福濟奏擬添備
礮船以資防勦一摺據稱巢湖水面遼闊必得戰船巡緝俟皖省
肅清卽可駛出長江助剿曾國藩前在江西所造長龍三板等船

最爲得力請飭令揀派將弁帶同工匠前赴廬州仿照製造所需洋礮請飭怡良等在上海關稅內撥款辦解等語皖省剿匪如果得有戰船則水陸互相策應較可得力著曾國藩卽揀派水師得力將弁一二員帶同熟諳造船工匠數十名前赴廬州聽候福濟差遣至製辦洋礮需款較鉅蘇省軍務孔亟深恐籌措維艱惟事關行軍要需未堪貽誤見在安徽造船尙需時日著怡良趙德轍屆時於上海關稅內撥款製辦五六百斤至二三百斤洋礮百餘尊派員解往以資攻剿將此由五百里各諭令知之○諭前據駱秉章奏稱崇陽通城一帶久爲賊藪因飭卽選道王鑫帶湘勇並新募兵三千駐紮岳州以重鄂湘兩省之防本日復據官文奏崇陽通城毗連江西瑞州義甯爲湖北省城後路王鑫進剿崇通土匪極爲得力請畱該員督率南勇駐紮崇通以清逆黨巢穴等語

王鑫駐紮岳州督辦崇通蒲圻等縣團練據稱漸有成效惟崇通一帶介居江西湖北之間爲逆賊往來孔道著該督撫卽飭該員帶兵前進駐紮崇通遇有往來賊匪隨時剿捕以清巢穴而杜亂萌將此由六百里諭令知之○免甫經收復之江夏漢陽二縣及漢川縣立營平毀地畝本年額賦○撥安徽備賑銀二萬兩分給亳州等九州縣及泗州衛買米平糶○丙申諭內閣官文等奏勦辦隨州土匪肅清等語前據官文奏派兵剿捕隨州土匪業將首匪趙邦璧等擒獲梟首茲據奏稱該匪等敗殘餘黨猶敢負固洪山經參將文明等督率兵勇攻奪洪山賊壘勇目魏占魁等直入賊巢殲斃匪眾數百生擒趙逆父子並其主謀逆匪等多名均卽訊明梟示所有洪山賊巢盡行焚燬所辦尙屬妥速逆首趙邦璧聚眾滋事抗拒官兵實屬罪大惡極見已擒渠壩穴隨州地方肅

清仍著督飭帶兵員弁將該州屬及京山等處匪黨搜捕淨盡以絕根株在事出力員弁兵勇准其擇尤保奏候朕施恩○官文胡林翼奏十一月二十五日我軍分路進剿下游各屬逆賊水陸抗拒楊載福以單舸迎敵分撥長龍三板整隊隨行連日轟毀賊舟無數陸路南岸李續賓由武昌縣進取興國大冶北岸都興阿等率馬步各軍由黃岡直擣蘄水蘄州沿途斃匪無數於二十六七八等日將興國大冶蘄水蘄州四屬先後克復敗匪竄入黃梅廣濟者極多十一月初一初二等日都興阿率營總多隆阿等進剿廣濟行抵蘄州廣濟連界之純陽橋逆眾萬餘直前來撲我軍四路衝壓斃賊千餘名餘逆潰逃我軍已紮廣濟境內力圖攻克進取黃梅查黃郡甫復興國等屬餘匪亟應搜除臣酌留馬步兵勇分路駐守並派總兵王國才帶兵勇四千人爲都興阿後路應援

據報已抵黃梅一俟廣濟黃梅得手即可會合李續賓等力攻九江彼時水陸各軍或全師由潯達皖或分兵會剿江西容卽相機籌辦又奏正拜摺間接都興阿咨初二日由廣濟曹家河進兵漢賊無數餘賊逃散者數千人都興阿會督孔廣順等兵勇規取廣濟將守卡守城各賊盡行殺斃於初三日將廣濟縣城克復見在賊勢全注黃梅其孔隴驛小池口等處聯絡賊營二百餘里臣見飭各軍奮力進攻肅清全楚上諭軍機大臣等我兵沿江下剿旬日之內克復興國大冶蘄水蘄州四屬並將廣濟縣城攻克辦理尙屬得手惟該匪尙踞黃梅孔隴驛小池口等處賊營二百餘里其勢尙張必須節節布置次第剿除以冀全楚肅清前因安徽江西兩省均關長江大局曾諭令官文等會商應由何路進兵本日據該大臣等奏稱俟黃梅廣濟得手力攻九江或全師由潯達

皖或分兵會剿江西此時水陸大軍勢如破竹必應謀定後戰體察江皖兩省情形相機進攻務操勝算方爲妥善各處甫經收復尤須妥爲布置水陸兼防毋令該匪乘間上竄復蹈從前覆轍此次大軍東下是否胡林翼督兵在前官文在後路接應仍著妥籌具奏本日據給事中宗稷辰奏江西義甯州一路與崇通等處山徑可通距武昌甚近亟宜埽除並稱道士洑田家鎮宜堅壘屯兵請飭胡林翼下圖九江未可局守自困等語嚴防崇通一帶並道士洑等處應否駐紮水軍前已諭令該大臣等籌辦仍著將該給事中所奏情形籌畫辦理原片著鈔給閱看將此由六百里各諭令知之○命五城飯廠展限一月○丁酉 上詣 天神壇祈雪○戊戌諭軍機大臣等恒春奏行抵曲靖籌辦回匪情形並據稱甯益宣威等處回民業經就撫而迤西之大理永昌迤東之開化

廣南各屬回匪仍行猖獗等語大理逆回尙敢劫害官弁是舒興
阿前奏該匪有求撫之意殊難憑信前經疊次諭知該督撫總宜
先勦後撫方能一勞永逸豈能專以諭令投誠爲事況近省之元
謀武定富民廣通迤西之蒙化賓川永平各屬均有回匪滋擾騰
越回匪亦俱蠢動幾於流毒全省急應迅速進兵痛加勦洗該督
此時計已早抵省城布置稍妥卽著帶兵出省擇最要之地先行
勦辦不得株守省垣致令鞭長莫及舒興阿身任巡撫無論省城
外府皆係統轄何得一籌莫展專恃恒春辦理著卽會商進勦事
宜毋得心存諉卸自干罪戾將此由五百里諭令知之○己亥諭
內閣惇郡王奕諒之第三子著命名載瀾○庚子諭軍機大臣等
慶祺等奏會籌商戶日捐釐捐試辦情形請飭吉林籌辦一摺盛
京兵餉待用孔亟庫款支絀該將軍等見擬釐捐鋪稅二條權行

試辦酌立章程令店商於買貨之家照所買價值每東錢百千抽捐東錢一千每糧十石捐東錢一千不及者以次遞減商賈鋪戶則量其生意大小分晰等第按戶逐日捐東錢數十文至一千餘文不等兩月以來辦理已有成效此項捐輸本屬權宜之計既據該將軍等奏稱該商等樂從自應照議辦理俾盛京兵餉稍資接濟惟不可稍有抑勒致拂輿情總期商賈樂輸庶可行之久遠至所稱奉天與吉林接壤商販貨物兩省流通請飭吉林一體辦理等語吉林地方是否能行釐捐鋪稅著景清體察該處情形酌量妥辦並著慶祺等將奉天見辦章程咨交景清查照俟辦有端緒再行酌擬章程具奏將此各諭令知之尋奏會籌商戶酌量妥辦分飭內外城遵照奉行報聞○辛丑諭內閣京師入冬以來僅得微雪一次農田尙未霑足疊經降旨設壇祈禱親詣大高殿拈

香並舉行 三壇祈雪祀典親詣 天神壇虔禱尙未渥沛祥霽
朕宵旰焦勞彌深乾惕因思清理庶獄冀可感召 天和所有刑
部及順天府見審人犯或因未經定案久羈囹圄疾病顛連情殊
可憫著各該衙門督飭承審各員速將見辦各案逐一清釐趕緊
審結其有情節可矜甚至含冤待白者務卽悉心研鞫立予平反
至問徒以下輕罪人犯以及干連待質人證訊明後卽行發落釋
省毋任稽遲積壓拖累無辜此外尋常案件並著速行完結以期
早返祥和用副朕欽恤惟刑之至意○何桂清奏南陵寒亭水陽
灣沚等處逆援仍圖竄併甯郡十一月二十六七八九等日逆眾
麇聚桃花園圍山妙葛山麒麟山等處鄧紹夏親督副將蕭知音
侍衛胡鳳鳴知府仲孫懋等軍分路進攻各有斬擒其城中之賊
分出二千餘人撲我東門外營盤鄧紹夏令吳再升等從東南路

分隊截殺賊竄入巢十二月初一日鄧紹夏進兵妙葛山逆眾伏巢死拒其南門外向有賊卡三處悍賊數千屯踞先經鄧紹夏密飭胡鳳鳴遣敢死之士潛入城中於是夜縱火焚賊資糧卡內之賊正在倉皇失措鄧紹夏復飭各營帶火器於三更時銜枚疾走拋入卡內一面乘勢衝殺賊卡三處同時焚毀斃賊不計其數餘孽竄併妙葛山初二日鄧紹夏派隊往攻更番疊擊斬首二千餘級撤隊後間諜回營知城中焚糧後賊勢甚蹙鄧紹夏卽於酉刻督令各軍前往攻城直衝城下沿城賊棚賊卡經我軍槍礮環圍燒毀淨盡蘇朝清帶勇數十人先從東門踊躍登城周萬遠曾得勝等亦從東西兩門而上蕭知音仲孫懋楊國正申明照驛散守城之賊而以賊礮旋轉返擊殲僞丞相朱鳳魁於陣逆眾奪路狂奔我軍奮勇勦洗餘逆逃出南門鄧紹夏復派隊追擊全股勦除

卽於初二日亥刻克復甯國府城查本年入春以來大江左右軍情疊變浙師援救廣信會剿東壩保護建平並攻復休甯祁門婺源黟縣太平涇縣茲又克復甯國府城所有出力文武員弁兵勇容與提臣鄧紹良查明併案保奏道員胡元博於甯國失守時未能先事豫防此次辦理糧臺得力功過相抵應毋庸置議臬司廖廉總司糧餉兼顧四安廣德防務臣不敢沒其微勞相應隨摺聲

明 上諭皖南官兵連獲大勝克復甯國府城前任浙江巡撫何桂清不分畛域撥兵籌餉攻復休甯祁門婺源黟縣太平涇縣茲又克復甯國府城實屬調度有方加恩著賞戴花翎浙江提督鄧紹良身先將士力拔堅城加恩著賞還花翎道員胡元博於甯國失守案內本有應得處分此次辦理糧臺出力功過尙足相抵著免其置議浙江按察使慶廉總司糧餉兼顧防務亦屬著有微勞

著交部從優議敘其餘出力員弁兵勇著何桂清會同鄧紹良查明保奏○諭蔣爵遠奏查辦保甲及民數穀數未能依限辦理一摺保甲與團練相輔而行貴州省苗教各匪勾結滋擾會據蔣爵遠以咸豐三年以來辦理團練頗著成效入奏朕方謂該撫自己將保甲章程實力經理乃復以匪徒滋擾未能清查爲辭實屬不知體要所有該省保甲事宜著蔣爵遠督飭所屬認真趕辦毋得視爲具文至每年秋收後造報民數穀數亦屬地方應辦事件並著該撫飭屬次第查辦毋許以軍務藉口任意延宕○以德瑛爲內閣學士由詹事遷○壬寅諭內閣考試應封宗室向按優平劣等第照封爵表條例辦理道光二十四年曾將降等給封之例酌改以示變通惟等第較次之員尙有停封永不准考之例日後加意學習亦無上進之路未免過於從嚴應如何酌量變通著宗人府覈

議章程具奏至向來考試章程均係閱定試卷後再閱馬步騎射此後或改爲先行看箭之處著一併酌議具奏○諭廓爾喀自咸豐二年進貢後兇又將居例貢之期惟念該國與唐古忒接壤甫經息兵若卽令其齎進方物遠道前來非所以示體恤所有咸豐七年廓爾喀例貢著免其呈進一次以示朕懷柔遠人之至意○諭赫特賀等奏詳查班禪額爾德尼呼畢勒罕所遺幼子等數掣定擬奏聞一摺本年十一月二十三日駐藏大臣等親往布達拉山會同呼徵阿齊圖呼圖克圖色呼本諾們罕率領僧俗人等嘍經由金瓶內掣出番民丹澤旺結之子拉木結旺堆嘉木參之名籤擬定爲呼畢勒罕是日天氣清和諸事祥瑞闔藏僧俗人等皆大歡喜呼徵阿齊圖呼圖克圖等按經理稱爲羅布藏班第衍垂濟扎克巴丹貝旺序實爲祥瑞之事朕心實深嘉悅著賞給該呼

畢勒罕大哈達一幅珊瑚數珠一串王如意一柄呼徵阿齊圖呼圖克圖哈一幅嵌玉如意一柄色呼本諾們罕哈達一幅嵌玉如意一柄交該大臣等轉行曉諭該呼徵阿齊圖呼圖克圖等及闊藏喇嘛將該呼畢勒罕妥爲護持以副朕廣興黃教之至意○癸卯福濟鄭魁士奏潛山縣與桐城安慶太湖接壤江西湖北之賊皆取道於此最爲險阻臣等以正兵攻桐城當以偏師取潛山使賊首尾難顧中路一軍知府李元華等十二月初一日行抵龍井關該逆紮營二座阻我進兵我軍奮勇爭先將賊營躡平斃賊七百餘名東路一軍甫過廬鎮關賊卡百餘人旋即驚散初二日由源潭鋪進勦該逆紛紛逃竄西路一軍行至天堂附近之王簿園該逆拌死抗拒汪龍化奮勇當先各兵皆以一當百立將賊寨燒毀臣等以三路既皆得手亟當乘勝進攻飭令拔隊直抵城根

初三日文錫璿與東路官兵已抵賊營極力攻擊約斃賊八百餘名將東門外賊營平毀史克寬會同西路官兵已抵西門李元華等已抵北門外賊營千總張照青等填濠直進截殺一百餘人將北門外賊營躡毀徐振卿等於四門豎立雲梯翻城而進殲賊無算南門竄出餘賊三百餘名復經我軍擒斬殆盡當將潛山縣城克復查潛山自咸豐三年冬間被賊竄踞其時以廬舒未復無可設法今幸大兵進剿斬關奪隘克復堅城兵事大有轉機在事尤爲出力之知府李元華等開列懇請分別獎勵其餘出力員弁兵勇團練容_臣等查明保奏外委夏鳳臺力戰陣亡請飭部從優議卹上諭安徽潛山縣久被賊踞茲以分兵進剿迅克堅城辦理尙屬得手知府李元華著賞戴花翎並交部從優議敘陣亡外委夏鳳臺著交部從優議卹其餘出力員弁兵勇團練著福濟等查

明保奏○以勦除崇通賊匪賞候選道王鑫按察使銜畱湖北以道員用○以安徽紳民協勦出力免潛山縣節年額賦永廣文武學額各三名○展普濟堂功德林粥廠兩月並發給應賞銀各一千兩○甲辰諭內閣湖南省自曾國藩統師東下卽籌備船礮接濟大軍甚資利用其經費均由在局紳士捐辦業經駱秉章奏請獎勵降旨加恩茲據胡林翼奏上年春初水師回駐武昌漢陽戰艦無多經駱秉章督飭船礮各局設法補救水師得以復振其接濟胡林翼軍營戰艦三百餘隻並運解火藥礮子及一切軍械爲數甚多均係該省官紳董辦實能盡力籌謀不分畛域所有湖南總局司道大員並紳局委員前次未經保奏者著駱秉章再行擇尤保奏以獎勤勞○官文胡林翼奏十一月二十六日李續賓仍由黃郡南渡會合富新巴克坦布及臣營知府邢高魁所派各軍

進勦大冶該縣本無城池賊難竊踞知縣岳屏環率團眾會合我軍接斬餘匪卽日直擣興國先是臣胡林翼於九月內商同湖南撫臣駱秉章派道員王鑫駐軍通山已豫斷賊之後路而李續賓又以屢勝之軍馬步齊攻勢如破竹賊遂不支開城而出我軍卽乘勢攻入斃賊約一千餘名將興國州城克復卽以邢高魁領軍駐城搜伏辦團窮治土匪李續賓會督馬步由江西瑞昌一路追勦直達九江此二十六至二十九等日收復大冶興國鄂省兩岸肅清之情形也臣楊載福於十一月二十五日克復黃州是夜卽率水師下駛二十六日行抵蘄州隨派正後營易景照新右營丁泗濱攻城斃悍賊二十餘人賊仍入城拒守楊載福於三更後飭兩營持火器火繩登岸進攻列炬如星而以千餘水師從中路轟城斬殺頗多賊卽遁走遂復蘄州其時署蘄水縣知縣劉榮等團

勇連日殺賊將斬水縣城同日收復二十八九等日水師由廣濟追賊至九江見城下賊泊礮船五十餘號對岸小池口泊二十餘號其輜重船約三四十號江岸護以礮壘臣楊載福令丁泗濱萬化林兩營從中流衝下以鈔攻兩岸賊船之尾王明山易景照兩營分擊其腰李濟清張啟基兩營迎擊其首餘營上下截擊斃賊無算賊棄船入壘死拒我軍併力以攻其壘賊又棄壘入城賊船除焚毀外悉爲我有九江以上之賊船片帆不返十二月初二日都興阿以其馬隊大捷於曹家河克復廣濟此十一月二十六至初二等日攻復蘄州斬水廣濟又水師大捷於九江奪獲賊船之情形也查楚境江面一律肅清兩岸均已肅定惟須窮治從亂之莠民撫馭瘡痍整飭吏治乃可善後曾國藩於十月內密約臣等以武漢克復速派水陸各軍先攻九江內湖水師亦期迅速會合

等語臣思武漢黃三府甫經收復應辦事宜頭緒紛繁勢難置省垣於不顧都興阿楊載福李續賓均已東下臣又檄飭參將鮑超改由北岸直趨小池口以瞰九江對岸統歸都興阿節制必可得力此次出力員弁兵勇可否由臣擇尤另案彙保出自恩施上諭此次湖北水陸各軍將沿江州縣迅速攻復水師已達九江連獲大勝江面賊船盡行焚奪所辦甚屬得手楚境沿江業已肅清仍著官文胡林翼等督飭各軍迅即乘勝攻克九江府城以扼江面而圖進取此次出力員弁兵勇准其擇尤保奏○諭軍機大臣等楚北官軍自攻克武漢黃三郡後連次收復大冶興國蘄州蕪水廣濟城池楊載福等率領水師直抵九江大獲勝仗該逆棄壘入城九江以上之賊船片帆不返胡林翼復飭參將鮑超由北岸趨小池口以瞰九江對岸統歸都興阿節制如果江西內湖水師

力能會合則潯城不難卽拔前據曾國藩等奏該省各路軍情似有起色上下游水營均能得力見在楚兵疊勝機會可乘亟宜激勵將弁由湖出江與楊載福都興阿水陸之師兩路夾攻俾九江賊匪應接不暇而克復後亦不至內竄各郡勿得專恃客兵致誤事機將此由六百里諭令知之○諭邵燦庚長奏擒匪倡營請飭撥察哈爾馬隊來徐一摺據稱擒匪李月等勾結張落刑等股三萬餘人闖入徐境史榮椿伊興額接戰未能得手該匪旋抵瓦口圍攻營盤勢甚危迫徐州馬隊僅吉林餘丁兩起不敷抵禦等語徐州地方緊要見在擒匪圍倡營盤勢極鴟張必須添撥馬隊以資衝突著桂良雙銳卽在景州防堵官兵內抽撥察哈爾馬隊官兵五百名交副都統德勒格爾統帶馳往徐州會同史榮椿進剿毋稍遲誤將此由五百里各諭令知之○諭本日據邵燦等奏徐

州營盤被賊環伺請飭調馬隊助剿一招徐州官軍出境剿賊屢獲勝仗惟兵力究屬單弱見在匪首李月勾結張落刑等闖入徐境史榮椿等迎剿未能得手退營固守徐州爲南北重鎮斷不可稍有疏虞英桂見駐亳州著卽就近酌撥勁旅無論馬隊步隊揀派得力將弁星夜馳往助剿或卽令袁甲三帶兵赴徐援應並著英桂體察情形迅速辦理毋稍遲誤將此由六百里諭令知之○諭官文胡林翼奏請飭購礮並加解火藥等語湖北水師剿辦賊匪自粵東運到夷礮六百尊攻剿甚爲得手見須再爲購運著葉名琛卽飭購辦四百斤以上夷礮三百尊五百斤以上夷礮二百尊六百斤至七百斤夷礮二百尊八百斤以上夷礮五十尊千斤至一千五百斤夷礮五十尊統於來年春夏間迅速由湖南運至武昌聽候調用並著吳振械譚廷襄駱秉章於四川陝西湖南三

省每月仍遵前旨各解火藥三萬斤外四川陝西按月各加解火繩三萬盤鳥槍臺槍鉛子各一萬斤湖南按月加解生鐵熟鐵合膛礮子十萬斤委員趕解胡林翼軍營以濟要需毋稍延誤將此由五百里各諭令知之○乙巳聯奎以病免以訥爾濟爲盛京兵部侍郎由左副都御史連○予貴州傷亡知州李杰等祭葬世職○丙午諭軍機大臣等據奏定三奏桐城軍餉本由地方官協同紳士捐米接濟見在該處捐米專歸鄭魁士營中該提督兵勇至日求一粥而不得誠恐糧盡勇散請飭福濟一手經理以歸畫一等語地方捐輸接濟軍餉自應均勻分撥斷無專供一軍之理況米捐出自紳耆尤應地方承辦福濟見在桐城所有接濟軍餉事宜著統歸該撫籌辦無論撥款採買委員勸捐總宜彼此勻撥不得稍有偏枯鄭魁士係奉旨督剿捻匪之員前因桐城克復在即暫畱該

處今桐城未能卽克而北路事機正在喫緊鄭魁士徒事逗畱必致兩失福濟已到桐城卽可攻勦桐城東南鄭魁士著卽前赴蒙城一帶督同各路帶兵鎮將會勦擒匪不准再有遷延致滋貽誤將此由六百里諭知福濟並諭秦定三鄭魁士知之○丁未諭軍機大臣等有人奏滇回猖獗情形一摺據稱該省辦理回匪半載尙無頭緒總由地方官意專主撫致令回匪藉求撫以售奸謀匪黨之在省城者以訓導明厯殿爲倚恃尋甸東川則誤於潘楷汪之旭之徇庇見在海口一帶投誠旣不可信姚州雖復匪眾皆赴大理欲圖永昌其廣西州邱北平彝等縣焚殺甚慘回性狡詐謬信其解散必致墮彼術中見在逆首卽係武進士馬名魁是其處心積慮謀逆已久斷難勸諭招降必得急加掃滅等語雲南回民固屬良莠不齊若不剪除首惡不但漢民受害卽良回亦必被脅

當此匪勢猖獗亟應懾以兵威若徒徇屬員畏難苟安之見妄思
議撫必致蹈大理之覆轍恒春見已回滇著卽妥籌勦辦毋失機
宜又據稱大理紳民赴省請勦舒興阿並不批示置若罔聞並稱
舒興阿見患怔忡任信門丁陳喜與巡捕施嘉瑞表裏爲奸員弁
稍失其意立得過譴是否屬實著恒春確切查明據實具奏毋稍
瞻徇原摺片均著鈔給閱看將此由五百里諭令知之○諭御史
李培祐奏山東曹州府定陶縣徐家樓有匪首徐札聚集多人劫
掠爲生各處無業遊民及在逃各犯俱投入夥本年直隸東明南
宮邯鄲等處明火搶劫之案皆出其黨各處差役皆與賊通一聞
緝捕卽暗遞消息必致聞風遠颺而地方官規避處分往往諱不
詳報恐日久又成巨患等語見在雙銳帶兵駐紮直隸山東交界
地方距定陶不遠著卽密派精兵馳往搜捕並著崇恩揀派明幹

員弁帶兵會同搜勦雙銳或酌派得力將弁帶兵前往或親自帶兵前往著該提督酌量辦理務將匪首徐札及著名夥黨拏獲嚴辦不得稍露聲色致令漏網將此由五百里各諭令知之○予江西陣亡巡檢路秉忠祭葬世職○戊申諭內閣崇恩奏擒獲著名匪首餘黨淨盡請將出力員弁酌保一摺擒匪王三托盤髻爲著名匪首聚眾滋事經該撫派委員弁分路查拏該匪復敢於充曹交界之梁山滿家峒等處會合另股捻首王方雲等裹脅饑民往來竄擾復經護曹州鎮總兵郝上庠等督帶兵勇疊次攻擊當將王方雲王三托盤髻等擒獲正法餘匪搜捕淨盡辦理尙爲妥速所有在事文武員弁著崇恩查明擇尤保奏毋許冒濫○官文胡林翼奏上游各路敗賊盡竄黃梅其盤踞唐家山孔隴驛小池口等處水陸賊營聯絡二百餘里十二月初九日我軍由大河鋪進

攻黃梅逆賊五六千人出城抗拒都興阿率翼長多隆阿等馬隊
直入賊陣斃悍賊百餘名賊勢不支適王國才率石清吉等兵勇
攀堞而登與賊酣戰賊由東門棄城逃竄我軍追殺二十餘里當
將黃梅縣城克復是日都興阿由沿江一路派營總祿昌攻孔隴
驛以牽小池口賊勢焚毀賊卡多處初十日孔廣順駐守黃梅派
兵至宿松太湖毗境搜剿伏匪多名探聞逆賊盡踞楚皖連界之
福林子地方賊數不下四五萬揚言回撲黃梅都興阿駐兵新凱
鎮以扼其衝查黃屬敗賊盡竄安徽宿松一帶道路紛歧防不勝
防見於各要隘駐兵扼守搜捕餘孽趕辦團練保護地方至小池
口與九江對岸賊築堅壘爲兩岸犄角之勢已飭水陸各軍痛加
勦洗再行會攻九江臣等當慎之又慎先清後路餘匪節節掃蕩
一俟潯城報捷分別援江達皖相機布置 上諭軍機大臣等湖

北上游各路敗匪盡竄黃梅縣唐家山孔隴驛小池口等處賊營聯絡我軍水陸並進克復縣城事機順利辦理甚屬得手惟該逆尙踞楚皖連界之福林子地方賊勢尙熾必須謀定後戰爲一鼓殲除之計不可令敗竄餘匪鈔我後路致有挫失小池口賊壘與九江互爲犄角我軍早爲攻克則潯城不難克復見在官文尙在漢陽胡林翼駐紮武昌辦理善後卽日移師東下該大臣等何人前進何人畱守地方著卽豫籌定議迅速奏聞總期步步爲營將本境餘匪盡數掃除然後水陸進攻庶不至再蹈從前覆轍將此由六百里各諭令知之○官文胡林翼奏武漢民多歸業臣見飭文武員弁窮搜餘孽趕辦團防當此餉項支絀亟須酌撤兵勇以節虛糜除下游得力兵勇並武漢兩城彈壓守禦酌畱二三千名外其應撤遣者萬餘人量給川資以免沿途肆擾又糧臺分設糜

費較多見議併歸武昌省城由

臣

胡林翼督同藩司經理所有防

剿及裁撤兵勇口糧川資由

臣

胡林翼總局一體酌發

臣

官文隨

營糧臺卽於年底截止以歸畫一

上是之

○己酉命桂良爲大

學士來京供職譚廷襄以二品頂帶署直隸總督以曾望顏爲陝

西巡撫

由順天府尹還

○以戶部尙書柏葰協辦大學士○予貴州殉

難總兵官桂林布政使陶廷杰知府鹿丕宗等雲南海口殉難吏

目王容彥陣亡從九品劉廷瑞等祭葬世職○庚戌諭內閣前因

理藩院奏咸豐三年九月賞給三盟兵丁銀兩內昭烏達盟未經

放給當令德勒克色楞明白回奏並派穆蔭肅順前往鑲藍旗蒙

古衙門查詢迨查出銀兩係該貝子隨後送交該旗衙門降旨派

御前大臣軍機大臣肅順會同訊究又訊出卓索圖盟前放賞銀

有私搭鈔票之事因將德勒克色楞解任候質茲據載垣等奏訊

明放銀遲延緣由及私搭鈔票情節分別定擬並究出卓索圖盟賞銀尙有兵丁未經關領請飭查訊各等語德勒克色楞於昭烏達盟應得賞銀日久未給迨奉旨飭查並未將遲延緣由據實奏明遽將銀兩送至該旗復任聽烏爾圖那蘇圖等於封皮倒填年月希圖掩飾其放給卓索圖盟銀兩既經查出達瑪林色登林布私搭鈔票通同舞弊僅私自責革未經送官究辦糊塗已極鑲藍旗蒙古都統土默特貝子德勒克色楞著卽照該王大臣等所擬革去爵職應得罪名交理藩院會同刑部照例定擬已革佐領林布達瑪林色登等私買官票抵換實銀營私舞弊實屬可惡除林布業經病故外達瑪林色登著熱河都統會同該盟長就近提訊奏明辦理已革章京烏爾圖那蘇圖於林布等舞弊代爲隱瞞收受銀兩馬匹雖所許銀兩並未入手實有應得之罪著交理藩院

會同刑部照軍營例治罪參領五德昆玉聽從德勒克色楞將銀兩送回旗庫並倒填封皮年月均有不合著交部議處鑲藍旗蒙古副都統巴雅爾綽克托於五德等領銀之事失於覺察前請議處之處著改爲交部察議至卓索圖盟賞銀該兵丁等尙有未經關領及所搭官票究係若干著熱河都統會同該盟長詳查具奏○諭軍機大臣等邵燦等奏徐軍剿匪獲勝請暫畱馬隊一摺據奏十六日官軍剿匪適關保全永帶赴懷遠之馬隊五百名繞道過境得以獲勝見在匪眾兵單恐援軍非旦夕可到擬暫畱吉林馬隊在徐州勦辦等語自爲軍務緊要起見直隸所調察哈爾馬隊一時尙未能到吉林馬隊既能得力自應准其暫畱徐郡俟直隸所調馬隊到時再令關保等前赴懷遠或令直隸馬隊前赴懷遠仍畱關保等馬隊在徐州助勦之處著邵燦庚長與英桂體察

情形酌量辦理徐州爲南北要衝斷不可稍有疏虞英桂曾否先派官兵前往協剿並著迅速奏報不得稍存畛域之見自干咎戾將此由六百里各諭令知之○壬子裕祭太廟○癸丑諭軍機大臣等福濟鄭魁士奏上游賊匪下竄請添兵助剿等語據稱武漢甯國各路敗匪紛紛竄入桐城安徽各處防不勝防且和州等州縣收復後又須增兵防剿兵力實形單薄所奏自係實情前次諭令英桂派穆騰阿帶察哈爾馬隊五六百名前赴安徽嗣經英桂奏請暫畱北路今皖省需兵甚急而就近各營舍此亦無可分撥著英桂卽遵前旨迅將此項馬隊交穆騰阿如數帶往以資分撥不得藉詞請畱徒滋延誤將此由六百里諭令知之○是月補賑山東長清等二縣被水災民一月口糧蠲免貴州貴陽等三十七府州縣暨冊亨州同羅斛大塘州判所屬被擾地方額賦蠲緩

江蘇太倉等五十三廳州縣被災地方漕糧川沙等七十廳州縣暨淮安等九衛直隸安州等七州縣湖南郴州等九州縣安徽壽州等二十三州縣浙江海甯等六十五州縣暨杭嚴等三衛湖北沔陽等三十州縣伊犁阿奇烏蘇等處江蘇橫浦等六場浙江仁和等五場被災被擾莊屯竈地額賦山西歸化城薩拉齊二廳被水村莊額賦並加賞災民銀米吉林三姓被水被雹地方額賦並賞八旗兵丁口糧緩徵直隸文安縣山東商河縣河南光州等六十五州縣被水被旱被蝗村莊額賦江蘇武進等七縣被旱白糧○是歲朝鮮入貢○會計天下民穀數除江蘇安徽湖北貴州未經冊報外直隸等省通共大小男婦二萬七千五百一十一萬七千六百六十一名口存倉米穀一千三百四十三萬五千八百六十九石三斗二升一合六勺